

四庫全書

史部

欽定四庫全書

史部

水經注集釋訂訛卷二十九至

詳校官監察御史臣周元良

刑部郎中臣許兆椿覆勘

總校官原任中允臣王燕緒

校對官中書臣吳裕德

謄錄監生臣何茹連

欽定四庫全書

水經注集釋訂訛卷二十七

歸安沈炳巽撰

沔水上

沔水出武都沮縣東狼谷中

漢志沮水出沮縣東狼谷南至沙羨南入江過郢五

行四千里師

古曰沮音夷

沔水一名沮水闕駟曰以其初出沮洳然故曰沮水

也縣亦受名焉導源南流泉銜水注之出河池縣東

南流入沮縣會于沔

元和志沮水出興州順政縣東北八十里按沮縣故城在今漢

中府略陽縣界晉永嘉後沒于氐羌縣廢後魏改置武興縣又僞置略陽西魏改略陽曰漢曲隋又改曰

順政唐為興州治宋復改順政曰略陽今在寧羗州北二百二十里河池今徽州屬鞏昌府泉街水在略

北陽縣

沔水又東南逕沮水戍而東南流注漢曰沮口

沮水戍在略陽

縣東南沔縣志曰沮水在縣西七十里與略陽接界漢水自寧羗州西北流逕沔縣故大安軍南又東北至青羊驛沮口在焉宋開禧二年金人陷大散關叛將吳曦退屯岷口旅還興州岷口即沮口也

所謂沔漢者也尚書曰嶠冢導漾東流為漢山海經

所謂漢出鮒嶠山也

按山海經作鮒魚之山

東北流得獻水口

庾仲雍云是水南至關城合西漢水漢水又東北合沮口同為漢水之源也故如淳曰北方人謂漢水為沔水故孔安國曰漾水東流為沔蓋與沔合也至漢中為漢水是互相通稱矣

沔水又東逕白馬戍南澧水入焉

水北發武都氐中南逕張魯城東魯沛國張陵孫曾學道於蜀鶴鳴山傳業衡衡傳於魯魯至行寬惠百

姓親附供道之費米限五斛故世號五斛米道初平
中劉焉以魯為督義司馬往漢中斷絕閣道用遠城
治因即嶠嶺周迴五里東臨濬谷杳然百尋西北二
面連峰接崖莫究其極從南為盤道登陟二里有餘
澧水又南逕張魯治東水西山上有張天師堂于今
民事之庾仲雍謂山為白馬塞堂為張魯治東對白
馬城一名陽平關澧水南流入沔謂之澧口其城西
帶澧水南面沔川城側二水之交故亦曰澧口城矣

後魏地形志沔陽縣有白馬城今在沔縣西南
即漢陽平關亦曰白馬戍澗水在縣西三十里

沔水又東逕武侯壘南

此條經文疑俱是注蓋經文不應先有武侯壘之名也

諸葛武侯所居也南枕沔水水南有亮壘背山向水
中有小城迴隔難解

沔水又東逕沔陽故城南

此十字宋本作經文原本
諺作注文今從宋本改定

城舊漢祖在漢中

此句疑有謬誤

言蕭何所築也漢建安二

十四年劉備并劉璋北定漢中始立壇即漢中王位

于此城

沔陽故城寰宇記在西縣東南
十六里在今沔縣東南十里

其城南臨漢

水北帶通達南面崩水三分之一觀其遺略厥狀時
傳南對定軍山曹公南征漢中張魯降乃命夏侯淵
等守之劉備自陽平關南渡沔水遂斬淵首保有漢

中諸葛亮之死也遺令葬乎

宋本作于

其山因即地勢不

起墳壟唯深松茂柏攢蔚川阜莫知墓營所在

在今沔縣

東南一
十里

山東名高平是亮宿營處有亮廟亮薨百姓

野祭步兵校尉習隆中書郎向充共表云臣聞周人
思邵伯之德甘棠為之不伐越人懷范蠡之功鑄金

以存其像亮德軌遐邇勳蓋來世王室之不壞實賴
斯人而使百姓巷祭戎夷野祀非所以存德念功追
述在昔者也今若盡順民心則黷而無典建之京師
又逼宗廟此聖懷所以惟疑也臣謂宜近其墓立之
沔陽斷其私祀以崇正禮始聽立祀斯廟蓋所啓置
也鍾士季征蜀枉駕設祠營東即八陣圖也遺基略
在崩褫難識

沔水又東逕西樂城北

在山上周三十里甚嶮固城側有谷謂之容裴谷道

通益州山多羣獠諸葛亮築以防違

宋本作過

梁州刺史

楊亮以即嶮之固保而居之為符堅所敗後刺史姜

守潘猛亦相仍此城城東容裴溪注之俗謂之洛水

也水南遵巴嶺山東北流水左有故城憑山即嶮四

面岨絕言先主遣黃忠據之以拒曹公溪水又北逕

西樂城東而北流注于漢

漢水又左得度口水

疑當作度水口
在沔縣南二里

出陽平北山水有二源一曰清檢出佳鱖二曰濁檢

出好鮒常以二月八月取之美珍常味

鱖華陽國志作鮒。索爾

雅云鮒大者鱖小者鮒郭注云鱖似鮒而大白色音畫華陽國志作鮒或是蜀語或寫誤耳廣雅云鮒一

名鱖今之鮒也度水南逕陽平縣故城東又南逕沔陽縣故

城東而南流注于漢水

又上疑有漢水字

又東右會溫泉水

口水發山北平地方數十步泉源沸湧冬夏湯湯望

之則白氣浩然言能瘥百病云洗浴者皆有硫黃氣

赴集者常有百數池水通注漢水

漢水又東黃沙水左注之

沔縣東四十里有沙水

水北出遠山山谷邃嶮人跡罕交溪曰五丈溪水側

有黃沙屯諸葛亮所開也其水南注漢水南有女郎

山

在今襄城縣西南

山上有女郎冢遠望山墳嵬嵬壯高及

即其所栽有墳形山上直路下出不生草木世人謂
之女郎道下有女郎廟及擣衣石言張魯女也有小
水北流入漢謂之女郎水

漢水又東合褒水

明一統志褒水發源漢中府洋縣太白山一名黑龍江又名紫金水經鳳

縣南流出褒谷入漢江入谷十餘里有石在水中如兜
鑿狀號曰將軍石又有大白石如盆名曰白玉盆宋文
同常刻
詩其上

水西北出衙嶺山東南逕大石門歷故棧道下谷俗
謂千梁無柱也諸葛亮與兄瑾書云前趙子龍退軍
燒壞赤崖以北閣道緣谷一百餘里其閣梁一頭入
山腹其一頭立柱於水中今水大而急不得安柱此
其窮極不可強也又云頃大水暴出赤崖以南橋閣
悉壞時趙子龍與鄧伯苗一戍赤崖屯田一戍赤崖

口但得緣崖與伯苗相間而已後諸葛亮死于五丈原魏延先退而焚之謂是道也自後紫舊修路者悉無復水中柱逕涉者浮梁振動無不搖心眩目也褒水又東南逕三交城城在三水之會故也一水北出長安一水西北出仇池一水東北出太白山是城之所以取名矣褒水又東南得丙水口水上承丙穴穴出嘉魚常以三月出十月入地穴口廣五六尺去平地七八尺

泉上疑有脫文

泉懸注魚自穴下透入水穴口向

丙故曰丙穴下注褒水故左思稱嘉魚出於丙穴良木攢於褒谷矣褒水又東南歷小石門門穿山通道六丈有餘刻石言漢明帝永平中司隸校尉犍為楊厥之所開逮靈帝建和二年漢太中大夫同郡王升

嘉厥開鑿之功琢石頌德以為石牛道

在今褒城縣境

來攻

本蜀論云

來攻當作來斂蜀志云來斂字敬達義陽新野人涉獵書籍善左氏春秋尤精倉雅

訓詁為太子家令累遷光祿大夫

秦惠王欲伐蜀而不知道作五石

牛以金置尾下言能屎金蜀王負力令五丁引之成

道秦使張儀司馬錯尋路滅蜀因曰石牛道厥蓋因而廣之矣蜀都賦曰岨以石門其斯之謂也門在漢中之西褒中之北褒水又東南歷褒口即褒谷之南口也北口曰斜所謂北出褒斜褒水又南逕褒縣故城東褒中縣也本褒國矣漢昭帝元鳳六年置褒水又南流入于漢漢水又東逕萬石城下城在高原上原高十餘丈四面臨平形若覆瓮水南過水為岨西北並帶漢水其城宿是流雜聚居故世亦謂之流雜

城元和志褒谷山在褒城縣北五里南口為褒北口
為斜長四百七十里褒水萬石城俱在褒城縣東

漢水又東逕漢廟堆下

在今南鄭縣西南

昔漢女所遊側水為釣臺後人立廟於臺上世人覩
其頽基崇廣因謂之漢廟堆傳呼乖實又名之為漢
武堆非也

又東過南鄭縣南

今漢中府治

縣故褒之附庸也周顯王之世蜀有褒漢之地至六
國楚人魚之懷王哀弱秦略取焉周赧王二年秦惠

王置漢中郡因水名也者舊傳云南鄭之號始於鄭
桓公桓公死於犬戎其民南奔故以南為稱即漢中
郡治也漢高祖入秦項羽封為漢王蕭何曰天漢美
名也遂都南鄭

今陝西漢中府治

大城周四十二里城內有

小城南憑北結環雉金墉漆井皆漢所修築地沃川
嶮魏武方之雞肋曰釋騏驥而不乘焉皇皇而更求
遂留杜子緒鎮南鄭而還晉咸康中梁州刺史司馬
勳斷小城東面三分之一以為梁州漢中郡南鄭縣

治也自齊宋魏咸相仍焉水南即漢陰城也相承言
呂后所居也有廡水出巴嶺山北流逕廡川故水得
其名廡水又北注漢水漢水右合池水水出旱山山
下有祠列石十二不辨其由蓋社主之流百姓四時
祈禱焉俗謂之獠子水夾溉諸田散流左注漢水

錐指以今輿地言之漾水出寧羗州北嶓冢山

寧羗

在漢中府西北
三百八十里

東北流逕沔縣西南合沔水又東

逕沔縣南

沔縣在府西
少北九十里

又東逕褒城縣南

在府西
北四十

里沔水去縣二十四里

又東逕南鄭縣南為漢水

去縣三里

經所

謂蟠冢導漾東流為漢者也

漢志隴西氏道下

云禹貢養水所出至武都為漢

師古曰氏夷種名也氏之所居故曰

氏道邑有蠻夷曰道晉永嘉後地沒于氏羌縣多荒廢氏道今不知所在

武都郡武都

縣下云東漢水受氏道水一名沔過江夏謂之夏

水入江

武都本白馬氏地漢元鼎六年開以為武都郡治武都縣今鞏昌府成縣西北百里

有仇池山山上有仇池城城東南有武都縣故城即漢武都郡治也

水經漾水出隴

西氏道縣蟠冢山東至武都沮縣為漢水常璩華

陽國志漢水有二源東源出武都氐道縣漾山為
漾水禹貢導漾東流為漢是也此皆依漢志以為
言然氐道漾水至武都為東漢水卒莫有能言其

所經者今按酈注濁水出濁城北

今成縣有濁水
成亦曰濁水城

胡三省云在上祿縣
東南武街城西北

東流與丁令溪水會又東逕

武街城南

今廣業郡治城在
今成縣西三十里

又東弘休水注之又

東逕白石縣南

白石今為
成縣治

又東南渥陽水注之又

東南與仇鳩水合又東與河池水合又東南兩當

水注之水出陳倉縣之大散嶺西南流入故道川
謂之故道水西南逕故道城東又西南入廣漢郡

界與沮水枝津合謂之兩當溪水上承武都沮縣

之沮水瀆

沮縣今略陽
沮水在縣東

西南流注於兩當溪又西

南注於濁水濁水南逕槃頭郡東

今略陽縣西北
一百里有長舉

廢縣後魏於
此置槃頭郡

而南合鳳溪水又東注於漢水觀此

文則漢志以沮水枝津上承氐道水下為東漢水

可知也氐道雖未詳其處所以地望度之當在西

縣之東河池之西上邽之南下辨之北濁水所受
有丁令溪水弘休水渥陽水皆出其北蓋自氐道
來也其中或有漢志所謂養水者但今無可考耳
然沮水枝津上承沮瀆自東入西非自西入東也
昔之觀水作記者不察地勢之高下不辨川流之
去來遂以為氐道養水合濁水兩當溪由枝津以
達沮沔是為東漢之源而不知其非也班固因之
故有此誤水經於武都下加沮縣二字蓋亦以氐

道水下通沮水為東漢之源也然漢志不言養水
出何山而水經復附會之曰嶠冢則氏道亦有嶠
冢山矣常璩知其非是故又因水以名其山曰漾
山而為之珠目要知氏道水所出別是一山非嶠
冢也近世言漢水者皆知班固之誤而不知其誤
所由來故詳著其原委如此 漢志隴西西縣下

云禹貢嶠冢山西漢水所出

括地志秦西垂宮即
漢西縣在秦州上邽

縣西南九十里元和志嶠冢山在上邽縣西南五
十八里然則山在故西縣東北去西縣三十二里

也上邽漢屬隴西郡唐為秦州治今鞏昌府秦州是志云西縣故城在州西南一百二十里嶠冢山在川西南六十里山不甚高而峯岫延長連屬若冢是山在西縣故城東北六十里也與括地元和二志里數不同蓋唐之上邽在今州之西南去西縣故城當較近但山不當更差二十八里耳州志城與山必南入廣漢白水東南至江州入江元和志有一誤

州景谷縣本漢白水縣屬廣漢郡宋為平興縣隋改曰景谷今四川保寧府昭化縣之白水鎮是也鎮在縣西百里白水在縣北二十里至縣東三里合嘉陵江漢巴郡治江州縣其故城在今重慶府巴縣西大江在縣東南隴西武都過郡四廣漢巴郡行二千嘉陵江至此入大江

七百六十里此與氏道之養水全無交涉水經非

一時一手作漾水篇首云漾水出隴西氐道縣岢
冢山東至武都沮縣為漢水此不過依漢志氐道
一條以立文惟加岢冢沮縣為不同耳其所謂漢
水即東漢亦與西縣之西漢全無交涉及觀下文
東南逕白水葭萌閬中至江州入江則又確是西
漢水與武都一條全無交涉矣首尾橫決必魏晉
間人所續也

經文有曰廣魏者故廣漢也蓋曹
氏改名漢後人續經此亦其一證尋

其意指蓋以氐道水南合濁水兩當溪歷槃頭郡

東而南為西漢水也

繁頭治長舉亦漢沮縣地

故酈注以為東

西兩川俱出蟠冢而同為漢水其言曰劉澄之云

有水從沔陽縣南至梓童漢壽入大穴暗通罌山

郭景純亦言是矣罌山穴小本不容水水成大澤

而流與漢合庾仲邕又言漢水自武遂川南入蔓

葛谷越野牛逕至關城合西漢水故諸言漢者多

言西漢水至葭萌入漢則兩川通波更在沮縣之

南矣嘗試以圖志考之漾沮雖有枝津與西漢通

要皆自東入西非自西入東也蓋嶠冢亘絕東西俗謂之分水嶺地勢東高而西下故西漢水自略陽縣南入寧羗州界即折而西南避高就下其性則然豈有東入之理澄之所言即禹貢之潛仲邕所言即通谷水也二水皆東漢之枝津西流入西漢水而說者乃謂西漢水至葭萌入漢顛倒之矣今嶺東漾沮枝津皆入西漢嶺西谿澗之水亦皆入西漢川流去來有目者盡能驗之其可是古而

非今乎 酈道元雖有東西兩川俱出嶓冢之說

而終以西漢為主注云今西縣嶓冢山西漢水所

導也西流與馬池水合又西南合揚廡川水又西

南逕始昌峽始昌縣故城西城在今西和縣北又西南逕

宕備戍南戍在西和縣東北又西南逕祁山軍南祁山在嶓冢之

西七十許里今在西和縣西北七十里又西逕蘭倉城南今禮縣東南有蘭倉

故城又南入嘉陵道而為嘉陵水禮縣本漢嘉陵道地屬武都郡西漢

水至此為嘉陵水傅同叔云嘉陵江出鳳州大散關西南嘉陵谷至興州北境當會東漢水而東行

安得越東漢而為西漢乎宋人以故道水為嘉陵江大非近志皆承其謬故道水合濁水至槃頭郡入西漢水至今猶然何言會東漢而不為西漢耶

又東南逕瞿堆西又屈

逕瞿堆南

瞿堆即仇池山在今成縣西北百里

又東南逕濁水城南

亦曰濁水戌在成縣西

又東南逕修城道南

今略陽縣西北有修城廢縣漢

志作循城屬武都治

又東南於槃頭城南與濁水合

詳見前又

東逕武興城南

今略陽縣治即武興故城唐為興州順政縣元和志嘉陵江經順政

縣南去縣百步

又西南逕關城北

關城即今陽平關在寧羌州西北八十里東至

沔縣一百七十里

又西南逕通谷

唐武德二年分縣谷縣之通谷鎮置金牛縣在

今寧羗州金牛驛西三十里庾仲邕曰漢水自武遂川南入蔓葛谷越野牛逕至關城合西漢蓋即此通谷水也通溪上又西南寒水注之寰宇記大承漾水曰獻水口寒水在三

泉故縣南十五里西流至龍門山入大石穴龍門山在故三泉縣西七十里今在廣元縣東北八十二里其水即禹貢之潛郭璞所謂從沔陽南流至漢壽入大穴中通峒山下西南潛出者也又

西逕石亭戍又逕晉壽城西又南合漢壽水在今廣元

縣南水經又東南至葭萌縣東北與羗水合注云白

水西北出臨洮縣西傾山又東南逕白水縣故城東又東南逕小劔戍北西去大劔三十里又東南

至吐費城南即西晉壽之東北也東南流注漢水

水有津關

元和志晉壽故城在利州益昌縣東南五十里本漢葭萌縣也此為西晉壽今

在昭化縣界白水即桓水嘉陵江自陝西寧羌州界東南流逕四川廣元縣西又西南逕昭化縣東南又南逕劔州東又東南入倉溪縣界白水關在寧羌州西南九十里接昭化界東北去關城一百

八十里水經又東南逕巴郡閬中縣注云巴西郡治

也閬水出閬陽縣而東逕其縣南又東注漢水又

東南逕宕渠縣又東南合宕渠水水北出南鄭縣

南巴嶺謂之北水東南流與難水合又東南流逕

宕渠縣謂之宕渠水又東南入漢

三巴記云閬白水南流曲折

三回如巴字即嘉陵江也自蒼溪縣界東南流逕閬中縣西南又東南逕南部縣東北又東南逕蓬州東又西南逕南充縣東又南入定遠縣界寰宇記云嘉陵水又名閬中水亦曰閬江亦曰渝水華陽國志曰閬中有渝水實民多居水左右天性勁勇銳氣善舞今所謂巴渝舞也宕渠故城在今渠縣東北七十里宕渠水亦名渠江重慶府志云嘉陵江自定遠縣流入合州界又一百九十里合渠江又十里至川城東南合涪江又南四十里入巴縣鄰道元以宕渠水為禹貢之潛非是水經

又東南逕江州縣東南入於江注云涪水注之故

仲邕謂涪內水者也

江州作江津誤今據漢志改正

以今輿地

言之秦州西和禮縣成縣

並屬陝西鞏昌府

略陽寧羌

並屬

漢中府

廣元昭化劍州蒼溪閬中南部

並屬四川保寧府

蓬

州南充

並屬順慶府

定遠合州巴縣

並屬重慶府

諸州縣界

中皆西漢水之所經也禹貢雖無西漢水然必周

知其所歷之地而後可以折東漢受氏道水之妄

且廣元以下即禹貢之潛昭化合白水亦即禹貢

之桓皆有關於經故備著之禹貢以嶓冢繫梁

州而漢志嶓冢在雍域之隴西一誤也禹貢云嶓

冢道漾而漢志以嶓冢所出為西漢水其漾水則
出氐道二誤也禹貢之潛乃漾水枝津西出為西
漢水而漢志西漢水出西縣之嶓冢三誤也漢志
不言漾水出何山而水經云出氐道縣嶓冢山是
氐道亦有嶓冢四誤也漾者東漢之源而續水經
者以西漢接漾水為一川五誤也漾沔枝津皆自
東入西而酈注從舊說云西漢水至葭萌入漢六
誤也川流離合地上灼然可見而酈注惑閼駟之

說以為原始要終潛流或一故東西俱受漢漾之名七誤也羣言殺亂學者靡所折衷今說漢水當排棄諸家專主禹貢以沮沔為漢之別源以西漢為漾之枝津而氐道水則存而不論是亦理亂絲

解連環之術也

按今陝西通志漢中府寧羗州有蟠冢山在州北九十里形如冢漢

水所出東入襄陽禹貢蟠冢導漾即此沔縣有漾水在舊大安軍南禹貢蟠冢導漾東流為漢褒城縣有沔水在縣南四里源出古金牛縣南沔合沮水南鄭縣有漢江在城南三里東流至漢陽府會大江水此與禹貢雖指所言相合又按黃宗義今水經嘉陵江即東漢水源出陝西鳳縣東嘉陵

谷歷兩當縣過略陽縣治西會東谷諸水流經漢中府城南三里歷陽縣石泉縣南過金州北漢水又東過郿西縣南又東北屈東南過均州東北過先化縣西南漢水又南逕穀城縣東均水入之漢水又東過襄陽城北又東南涓水從北來注之漢水又南逕安陸州治西過宜城縣東夷水東流注之漢水經潛江縣分為潛江入于江漢水又東南曰水注之又經當陽縣之東漢水又東南涓水入焉漢水又東南至荆門川東九十里至大別山入於江其水自岫冢為漾水沔縣為沔水漢中為漢水至荆山東為滄浪水蓋因地而稱名也其中所叙之水又與雖指所記詳略不同備錄之以俟參考

漢水又東得長柳渡

長柳村名也漢太尉李固墓碑銘尚存文字剥落不

可復識漢水又東逕胡城南

在今城固縣西四十里
明一統志云漢張騫使

匈奴與胡婁堂
邑父俱還居此

義熙十五年城上有密雲細雨五色

昭章人相與謂之慶雲休符當出曉乃雲霧及角城

崩

原本作乃覺今
從朱本作及角

半許淪水出銅鍾十二枚刺史索

邈奉送洛陽歸之宋府

何氏校當
作宋公府

南對扁鵲城

在今
城固

縣西南
四十里

當是越人舊所逕涉故邑流其名耳漢水出

于二城之間右會盤余水水出南山巴嶺上泉流兩

分飛清派注南入蜀水北注漢津謂之盤余口庾仲
雖曰磐余去胡城二十里

漢水又左會文水

文水在城固縣西北四十里兩水合流如文字

水即門水也出胡城北山石穴中長老云杜陽有仙人宮石穴宮之前門故號其川為門川水為門水東南流逕胡城北三城竒對隔谷羅布深溝固壘高臺相距門水右注漢水謂之高橋溪口

漢水又東黑水注之

黑水在城固縣西北五里

水出北山南流入漢庾仲雖曰黑水去高橋三十里
諸葛亮牋云朝發南鄭暮宿黑水四五十里指謂是
水也道則百里也

又東過城固縣南又東過魏興安陽縣南

蔡傳云安陽今洋州真符

縣真符在今洋縣西六十里元省入洋川

涪水出自旱山北注之

旱山在今南鄭縣東

南漢志安陽鷲谷水出西南入漢師古曰鷲音潛其字亦或從水涪潛古字通或以為禹貢之潛非是酈注云涪水即黃水也

常璩華陽國記曰蜀以城固為樂城縣也安陽縣故

隸漢中魏分漢中立魏興郡安陽隸焉泝水出西南

而東北入漢左谷水出西南而東北入漢左

宋本作右

水出漢北即智水也

朱曰六朝壻字皆書作聃此智水智鄉即聃水聃鄉也後世傳

寫誤作智字

北發聽山山下有穴水穴水東南流歷平川

中謂之智鄉水曰智水川有唐公祠唐君字公房城

固人也

明一統志作唐公昉漢城固人王莽居攝二年公昉為郡吏忽遇異人授以藥拔宅仙去

或云李八百居寒山公昉師事之

學道得仙入雲臺山合丹服之白

日升天雞鳴天上狗吠雲中唯以鼠惡留之鼠乃感

激以月晦日吐腸胃更生故時人謂之唐鼠也公房

升仙之日壻之

何氏云之
繇釋作知

行未還不獲同階雲路約

以此川為居言無繁霜蛟虎之患其俗以為神因號

為壻鄉故水亦即名焉百姓為之立廟於其處也刊

石立碑表述靈異也壻水南歷壻鄉溪出山東南流

逕通關勢南山高百餘丈上有匈奴城

朱云舊本作
匈奴城吳改

作匈奴未有所因疑當作丘如城按元和志云匈奴城在今城固縣西吳本改原不誤朱自誤耳

方

五里濬塹三重高祖北定三秦蕭何守漢中欲修北

道通關中故名為通關勢壻水又東逕七女冢冢夾

水羅布如七星高十餘丈周迴數畝元嘉六年大水

破墳崩出銅不可稱計得一塼刻云項氏伯無子

七女造擲世人疑是項伯冢

何氏云項伯封射陽侯冢安得在此

水北

有七女池池東有明月池狀如偃月皆相通注謂之

張良渠蓋良所開也壻水逕樊噲臺南

在城固縣北五里臺

高五六丈上容百許人又東南逕大城固北城

元和志漢

水逕城固縣南去縣二里今城固縣北有城固北城漢置即大城固也

乘高勢北臨壻

水水北有韓信臺

在漢中府城內西南

高十餘丈上容百許人

相傳高祖齋七日置壇設九賓禮以禮拜信也壻水

東迴南轉又逕其城東而南入漢水謂之三水口也

漢水又東會益口

益水在洋縣西北二十五里

水出北山益谷東

南流注于漢水

漢水又東至瀟城南

在今洋縣東北二十三里興勢故城是也

與洛谷

胡云當作

駱瀟谷在縣北即駱谷之南口水合

水北出洛谷谷北通長安其水南流右則瀟水注之

水發西溪東南流合為一水亂流南出際其城西南

注漢水

漢水又東逕小城固南

今洋縣治即興道縣故城小城固城在縣東漢水經興道縣南

去縣一百步寰宇記云漢水自發源至此
屈曲行三百七十里入金川漢陰縣界

州治大城固移縣北故曰小城固城北百二十里有

興勢坂諸葛亮出洛谷成興勢置烽火樓處通照

疑作

照宋本作臨

漢水東歷上濤而逕於龍下蓋伏石驚湍流

屯激怒故有上下二濤之名龍下地名也有邱擲墳

墟舊謂此館為龍下亭自白馬迄此則平川夾勢水

豐壤

原本
詢壤

沃利方三蜀矣度此溯洄從漢為山行之

始

漢水又東逕石門灘

灘在洋縣
東五十里

山峽也東會酉水水北出秦嶺酉谷南歷重山與寒

泉合水東出寒泉湧

疑漏
出字

山頂望之交橫似若瀑布

頽波激石散若雨灑勢同厭源風雨之池

雷次宗豫
章記云厭

原山西北有洪井井北五六里有
風雨池山高疑激霏散遠灑若雨

其水西流入于酉

水酉水又南注漢謂之酉口

漢水又東逕媯墟為灘

在今金州治北梁州城虞舜常居之謂之媯墟帝王世記謂之

媯墟

世本曰舜居媯汭在漢中西城縣或言媯墟在西北

舜所居也或作媯

疑當作媯

墟故舜所居

當作媯姓

也後或姓

姚或姓媯媯姚之異事妄未知所從余按應劭之言

是地於西城為西北也

漢水又東逕猴

何氏校改侯

經灘

山多猴猿好乘危綴飲故灘受斯名焉

漢水又東逕大小黃金

疑漏南

黃金戌在今洋縣黃金谷張魯築城西魏置黃

金縣宋乾德中并入真符縣

山有黃金峭水北對黃金谷有黃金戌傍山依峭嶮折七里氏掠漢中岨此為戌與鐵城相對一城在山

上容百餘人一城在山下可置百許人言其嶮峻故

以金鐵制名矣昔楊難當令魏興太守薛健據黃金

姜寶據鐵城

鐵城戌在黃金廢縣西北八里城在山上極險峻故名宋遣秦州

刺史蕭思話話令陰平太守蕭祖攻拔之賊退酉水

矣

宋書蕭思話傳羌帥揚難當寇漢中起思話為橫野將軍南梁秦二州刺史遣南漢中太守蕭諱進

據破頭難當焚掠漢中引眾西還留其將趙溫守梁州魏興太守薛健據黃金諱遣陰平太守蕭坦赴黃金薛健副姜寶據鐵城鐵城與黃金相對去一里斫樹塞道坦進攻二戍拔之二月趙溫又率薛健來攻坦營坦奮擊大破之賊退保西水今云蕭祖誤酉水作西水宋書之誤也

漢水又東合蘧蔭溪口

水北出就谷在長安西南其水南流逕巴溪戍西又南逕陽都坂東坂自上及下槃折一十九曲西連寒

泉嶺漢中記曰自西城涉黃金峭寒泉嶺陽都坂峻
嶢百重絕日萬尋既造其峰謂以踰崧岱復瞻前嶺
又倍過之言陟羊腸超煙雲之際顧看向塗杳然有
不測之嶮山豐野牛野羊騰巖越嶺馳走若飛觸突
樹木十圍皆倒山殫良岨地窮坎勢矣其水南歷蘧
蔭溪謂之蘧蔭水而南流注于漢謂之蔭口

陽都坂
蘧蔭水

皆在洋縣東北又有子午道在縣東一百六十里元和志黃金縣有驛即子午道也舊道在金州安康縣界梁王仁念別開此路

漢水又東右會洋水

明一統志洋水在西鄉縣東二十里自星子山出西北流入木馬河

川流漫濶廣幾里許洋水導源巴山東北流逕平陽

城漢中記曰本西鄉縣治也自城固南城入三百

八十里距南鄭四百八十里洋川者漢戚夫人之所

生處也高祖得而寵之夫人思慕本鄉追求洋川

朱本

作追求洋川朱本

帝為驛致長安高帝為澤致長安蠲復其鄉更名曰

縣又故目其地為洋川用表夫人誕載之休祥也城

即定遠矣漢順帝永光七年封班超以漢中郡南鄭

縣之西鄉為定遠侯即此也洋水又東北流入漢謂

之城陽水口也

隋志西鄉縣有洋水元和志經縣東八里平陽城在今西鄉縣南界

漢水又東歷教頭

按宋書當作礮頭

舊立倉儲之所傍山通道水陸嶮湊魏興安康縣治

有成統領流雜

安康縣今為漢陰縣本漢安陽縣屬漢中郡晉改安康縣屬魏興郡

漢水又東合直水

水北出子午谷岩嶺下又南枝分東注旬水又南

南下

疑有脫文

從閣下山上有成置於崇阜之上下臨深淵張

子房燒絕棧閣示無還也又東南歷直谷逕直城西

而南流注漢

直城西與今石泉縣接界
寰宇記漢水在縣東百步

漢水又東逕直城南

魏地形志金城郡治直城
縣其故城在今漢陰縣西

又東逕千渡而至蝦蟇嶺

原本
訛顛

歷漢陽漁口而屈于

彭溪龍竈矣並溪澗灘磧之名也

漢水又東逕晉昌郡之寧都縣南

按晉昌郡乃晉惠帝
時置後之魏興郡乃

曹魏時置水經為漢人所作不當先有晉昌魏興之名
恐疑是注譌作經文寧都故城在漢陰縣東七十里晉
置屬晉昌郡唐改漢陰寰宇記漢水在漢陰縣南二里
今在縣西沈約宋志魏興郡有廣陰縣其故城在今紫

陽縣東南漢水
在縣南門外

縣治松溪口又東逕魏興郡廣城縣治王谷谷道南
出巴獠有鹽井食之令人癭疾

漢水又東逕魚脯溪口

按注則溪字
當作谷字

舊西城廣城二縣指此谷而分界也

又東過西城縣南

漢水自紫陽縣界折而東北流入興
安州界州本漢西城縣曹魏改魏興

郡梁改為東梁川西魏以其地出金改為金州唐宋元
明因之本朝改曰興安州領縣五元和志漢水去州

城百步水
出徒金

漢水又東逕鰲池而鯨灘鯨大也蜀都賦曰流漢湯
湯驚浪雷奔望之天迴即之雲昏者也漢水又東逕
嵐谷北口嶂遠溪深澗峽嶮邃氣蕭蕭以瑟瑟風颭
颭而颭颭故川谷擅其目一作美矣

漢水又東右得大勢

勢岨急溪故亦曰急勢也依山為城城周二里在峻
山上梁州督護吉挹所治苻堅遣偏軍韋鍾伐挹挹
固守二年不能下無援遂陷

晉書忠義傳吉挹字祖冲馮翊蓮勺人也孝武

初為魏興太守加輕車將軍領晉昌太守苻堅遣將
韋鍾攻魏興挹遣衆拒之斬首七百餘級加督五郡
軍守鍾率衆欲趣襄陽挹又邀擊斬五千餘級鍾怒
迴軍圍之挹又屢挫其銳其後賊衆繼至挹力不能
抗城遂陷挹引刀欲自殺其友止之挹不從其
友逼奪其刀會賊執之挹閉口不言不食而死

漢水右對月谷口

山有坂月川於中黃壤沃衍而桑麻列植佳饒水田
故孟達與諸葛亮書善其川土沃美也

漢水又東逕西城縣故城南

地理志曰西城故漢中郡之屬縣也漢末為西城郡

建安二十四年劉備以申儀為西城太守儀據郡降

魏魏文帝改為魏興郡治故西城縣之故城也氏略

漢川梁州私

朱彘曰舊本作私治謂氏略漢川梁州而私治于此也吳改弘治孫云當作移

治何氏云作移為得吳謬矣

治於此城內有舜祠

在西鄉縣境內

漢高帝

廟

在城固縣東十里

置民九戶歲時奉祠焉

漢水又東為鱣湍

洪波洿盪瀟浪雲頽古者舊言有鱣魚奮鱗逆流望

濤直上至此則暴鯁失濟故因名湍矣

漢水又東合旬水

在今洵陽縣治南漢志漢中旬陽縣北山旬水所出南入沔

水北出旬山東南流逕平陽戍下與直水枝分東注

逕平陽戍入旬水旬水又東南逕旬陽縣

今屬興安州

與

柞水合水西出柞溪南流逕重崖堡西屈而東流逕

其堡南東南注于旬水旬水又東南逕旬陽縣南縣

北山有懸書崖高五十丈刻石作字今人不能上不

知所道山下石壇上有馬跡五所名曰馬跡山旬水

東南流注漢謂之旬口

漢水又東逕木蘭塞南

石岸有城名陵城周迴數里左岸壘石數十行重壘
數十里中謂是處為木蘭塞云吳朝遣軍救孟達於
此矣

漢水又東左得育漢

雖指作
育漢

與晉旬陽二縣分界於是谷漢水又東谷

谷疑為
當作合 雖

指作左得朱
木作東注

甲水口水出秦嶺山東南流逕金井城

南又東逕上庸郡北與關柎水合水出上洛陽亭縣

北青泥西山南逕陽亭聚西俗謂之平陽水南合豐鄉川水水出弘農豐鄉東山西南流逕豐鄉故城南

京相璠曰南鄉浙縣有故鄴鄉春秋所謂鄴浙也

左傳

作豐折漢志弘農郡有析縣

於地理屬弘農今屬南鄉

何氏云南鄉當作南

陽或作內鄉

又西南合關柎水關柎水又南入上津注甲

水甲水又東南逕魏興郡之與陽南

宋本作興陽南按晉書地志魏

興郡六縣有洵陽而無興陽宋本亦誤

晉武帝太康中立甲水又東右

入漢水漢水又東為龍淵淵上有胡鼻山石類胡人

鼻故也下臨龍井渚澗深數丈

漢水又東逕魏興郡之錫縣故城北

此經文亦疑是注接為白石灘句文

亦順

為白石灘縣故春秋之錫穴地也故屬漢水衍中王

莽之錫治也縣有錫義山

在今郿縣一名天心山

方圓百里形

如城四面有門上有石壇長十餘丈世傳列仙所居

今有道士被髮餌术恒數十人山高谷深多生薇蘅

草其草有風不偃無風獨搖漢水又東逕長利谷南

入谷有長利故城舊縣也

漢志漢中長利縣有郿關其故城在今郿西縣西南

漢水又東歷姚方

益舜後枝居是處故地留姚稱也

此下經云汜水東過襄陽縣北竊堯

與上文似不屬疑有錯簡及考胡渭禹貢錐指此下接汜水下篇東過堵陽縣云云至東運隆中廿一節而後接東過襄陽北一卷為分三江入海而止相其文義殊為條貫但其升下篇于上篇之末而退中篇于汜水之尾必有所本東樵先生既赴玉樓無從覩質姑從其改定之本撮錄以俟再考

水經注集釋訂訛卷二十七

欽定四庫全書

水經注集釋訂訛卷二十八

歸安沈炳巽撰

沔水中

又東過堵陽縣

堵陽縣今為河南南陽府裕州故城在今湖廣襄陽府鄖縣及南陽府之裕州

界堵水出焉自上粉縣北流注之

雖指引作堵水入焉堵水在襄陽竹山縣

南源出陝西平利縣界下流過竹山縣東入漢水

堵水自建平郡界故亭谷東歷新城郡郡故漢中之

房陵縣也世祖建武元年封鄧晨為侯國也

按後漢書鄧晨

傳光武即位封晨房子侯注云房子今趙州縣漢志房子屬常山郡通典趙州臨城縣注云舊是房子天寶中改曰臨城今屬直隸正定府非沔水經行之地房陵今為襄陽府房縣又非鄧晨所封之國奈何以常山之房子謊作漢中之房陵耶所不解矣漢末以為房陵郡魏文帝合

房陵上庸西城立以為新城郡以孟達為太守治房

陵故縣有粉水縣居其上故曰上粉縣也

上粉縣在今房縣境

堵水之傍有別溪岸側土色鮮黃乃云可噉有言飲此水者令人無病而壽豈其信乎又有白馬山山石

似馬望之逼真側水謂之白馬塞孟達為守登之而
歎曰劉封申耽據金城千里而更失之乎為上堵吟
音韻哀切有惻人心今水次尚歌之堵水又東北逕
上庸郡故庸國也春秋文公十六年楚人秦人巴人
滅庸庸小國附楚楚有災不救舉羣蠻以叛故滅之
以為縣屬漢中郡漢末又分為上庸郡今石泉竹山二縣地城
三而際水堵水又東逕方城亭而東北歷麥山下而北
逕堵陽縣南北流注于漢謂之堵口漢水又東謂之

澇灘冬則水淺而下多大石又東為淨灘夏水急盛
川多湍洑行旅苦之故諺曰冬澇夏淨斷官使命言
二難阻礙

又東過鄆鄉縣南

今鄆陽府治

漢水又東逕鄆鄉縣南之西山山上有石蝦蟇倉卒
看之與真不別

漢水又東逕鄆鄉縣故城南

謂之鄆鄉灘縣故黎也即長利之鄆鄉矣地理志曰

鄆有闕李奇以為鄆子國晉太康五年立以為縣鄆

鄆鄉

本漢錫縣唐屬均州元改鄆縣元和志鄆鄉縣漢水西自豐利縣界流入南去縣三里豐利今白河也

漢水又東逕琵琶谷口

梁益二州分境於此故謂之琵琶界也

又東北流又屈東南過武當縣東北

今為均州在襄陽府西北三百九十

里西去興安州七百里

縣西北四十里漢水中有洲名滄浪洲庾仲讎漢記

謂之千齡洲非也是世俗語訛音與字變矣地說曰

水出荆山東西

胡引作南

流為滄浪之水是近楚都故漁

父歌曰滄浪之水清兮可以濯我纓滄浪之水濁兮

可以濯我足余按尚書禹貢言導漾水東流為漢又

東為滄浪之水不言過而言為者明非他水決入也

蓋漢沔水自下有滄浪通稱耳纏絡鄢郢胡引作郢地連

紀郢咸楚都矣漁父歌之不違水地滄浪洲傳朱箋滄浪

洲傳宋本作按考洲傳但洲字恐亦譌當作按考經傳差為得耳

宜以尚書為正耳

自均州以至漢陽皆名滄浪之水故曰是近楚都

禹貢錐指曰以今輿地言之漢水自南鄭縣南又

東逕城固縣南

城固在漢中府東少北七十里水去縣四里舊志云縣東二里有飲

馬灘每子午二時湖響如雷又五里為上濤下濤龍亭廢縣在縣東龍亭山下即龍下也又東

逕洋縣南

洋縣在府東南一百二十里水去縣二里

又東逕西鄉縣東

北

西鄉在府東南二百二十里

又東南逕石泉縣南

石泉在興安州西二

百五十里水去縣五十步

又東逕漢陰縣南

漢陰在州西少北一百六十里水去

縣八又東逕紫陽縣南

紫陽在州西南一百八十里州志云有怯難在縣西

十五里水陡如闢又大力灘在縣西八里兩岸夾石左右有兩石背最為舟楫患又石梁灘在縣西

當任河水口中宮灘在縣東南一里極高險中流有柱石怒濤之聲如雷長灘在縣東四里近汝河

灘不甚險尚舟停集漁又東北逕興安州北州志云州

火絡繹皆漢水所經也境漢江多灘麩灘串灘二郎灘為險而神灘尤甚明成化十三年知州鄭福於孟冬時用火燒石疏

鑿以殺其勢每行利馬州東一里有長春隄成化八年為水衝壞十五年鄭福增築高堅萬歷二十

年復加又東逕洵陽縣南洵陽在州東一百二里又

修築東逕白河縣北白河在州東南一百七十里又東逕鄆西縣南

鄆西在湖廣鄆陽府西一百四十里水去縣五十里又南逕鄆縣南明成化十二年

置鄆陽府治鄆縣舊志云漢江自城西又東逕均遠城南寶蓋天馬諸山皆錯列漢濱

州北均州在襄陽府西北三百九十里水去州四十里經所謂又東為滄浪之水者也

漢水又東為很子潭

潭中有石磧洲長六十丈廣十八丈世亦以此洲為很子墓父於斯故潭得厥目焉所未詳也

漢水又東南逕武當縣故城北

世祖封鄧晨子堂

按晨傳當作棠

為侯國內有一碑文字磨

滅不可復識俗相傳言是華君銘亦不詳華君何代

之士

漢水又東平陽川水注之

水出縣北伏觀山南歷平陽川逕平陽故城下

平陽故城

在今均州界

又南流注于沔

沔水又東南逕縣城東

又東曾水注之水導源縣南武當山一曰太和山亦

曰參上山山形特秀又曰仙室

明一統志太和山在均州南一百二十里

山有二十七峰三十六岩二十四澗五臺五井三泉三潭初名仙室山又名太嶽山正武奉元君之言遊

覽至此改名太和其中一峰最高者舊為天柱峰亦曰紫霄峰因接止修煉後人謂非正武不足以當之又更名荆州高副記曰山形特秀異於衆嶽峰首狀武當山博山香爐亭亭遠出藥食延年者萃焉晉咸和中歷陽謝允捨羅邑宰隱遁斯山故亦曰謝羅山曾水發源山麓逕越山陰東北流注于沔謂之曾口

沔水又東逕龍巢山下

山在沔水中高十五丈廣員一里二百三十步山形峻峭其上秀林茂木隆冬不凋

又東南逕涉都縣東

宋本作城北

故鄉名也按郡國志筑陽縣有涉都鄉者也漢武帝

元光元年

按史表是元封元年

封南海守降侯子嘉為侯國均

水於縣入沔謂之均

何氏云均當作均詳沔水下

口也

涉都城在今穀城縣

界均水自南陽府浙川縣流逕均川至穀城入漢今故道已湮

又東南過鄮縣之西南

縣治故城南臨沔水謂之鄮頭漢高帝五年封蕭何

為侯國也薛瓚曰今南鄉鄮頭是也茂陵書曰在南

陽王莽更名南庾者也

今光化縣有鄱縣故城

又南逕穀城東又南過陰縣之西

今穀城縣北有故穀城陰縣故城在今光

化縣東北

沔水東逕穀城南而不逕其東矣城在穀城山上春秋穀伯綏之邑也墉闐頽毀基塹亦存沔水又東南逕陰縣故城西故下陰也春秋昭公十九年楚工尹赤遷陰于下陰是也縣東有縣令濟南劉熹字德怡魏時宰縣雅好博古學教立碑載生徒百有餘人不

終業而天者因堊其地號曰生墳

沔水又東南得洛溪口

水出縣西北集池陂東南流逕洛陽城

何氏云洛陽疑作筑陽

北抗洛溪溪水東南注沔水也

又南過筑陽東

筑陽廢縣在今穀城縣東四里

筑水出自房陵縣東過

其縣南流注之

沔水又南汎水流注之水出梁州閬陽縣魏遣夏侯

淵與張劭下巴西進軍宕渠劉備軍汎口即是水所

出也張飛自別道襲張卽於此水卽敗棄馬升山走

還漢中汎水又東

東下疑有還字

巴西壁巴渠北新城上庸

東逕沔陽縣故城南晉分筑陽立自縣以上山深水

急狂渚崩湍水陸徑絕

閬陽沔陽未詳所在

又東逕學城南

梁州大路所由也舊說昔者有人立學都於此值世

荒亂生徒固依遂共立城以禦難故城得厥名矣汎

水又東流注于沔謂之汎口也沔水又南逕闕

胡云一作

開林山東

在穀城縣西北四里

本郡陸道之所由山東有二碑

其一即記闕林山文曰君國者不躋高堙下先時或

斷山豈

宋本作岡

以通平道民多病守長冠軍張仲瑜乃

與邦人築斷故山道於

當是作或當作於此立銘

此銘其一郭先

生碑先生名輔字甫成有孝友悅學之美其女為立

碑於此蓋

宋本作並

無年號皆不知何代人也

沔水又南逕筑陽縣東

又南筑水注之杜預以為彭水也水出梁州新城郡

魏昌縣界縣以黃初中分房陵立筑水東南流逕筑

陽縣水中有孤石挺出其下澄潭時有見此石根如

竹根而黃色見者多凶相與號為受疑石酉陽雜俎

承受所未詳也筑水又東逕筑陽縣故城南縣故楚

附庸也秦平鄢郢立以為縣王莽更名之曰宜禾也

建武元年世祖封吳財為侯國後漢書吳漢傳建武二十八年封漢子時

為筑陽侯今云筑水又東流注于沔謂之筑口沔水

又南逕高亭山東山有靈焉士民奉之所請有驗今南

陽府穀城縣治即筑陽故城
筑水在縣南高亭山在縣北

沔水又東為漆灘

新野郡山都縣與順陽筑陽分界於斯灘矣

又東過山都縣東北

今襄陽縣西北
有山都故城

沔南有固城城側沔川即新野山都縣治也舊南陽
之赤鄉矣秦以為縣漢高后四年封衛將軍王愔為

侯國

按史表作王恬漢表
作恬啓今云王愔誤

沔北有和城即郡國志所

謂武當縣之和城聚山都縣舊嘗治此故亦謂是處

為故縣灘沔水北岸數里有大石激

疑作礮
下同

名曰五

女激或言女父為人所害居固城五女思復父怨故
立激以攻城城北今淪於水亦云有人葬沔北墓宅
將為水毀其人五女無男皆悉巨富共修此激似今
墳宅然激作甚工又云女嫁為陰縣狼子家貨萬金
而自少小不從父語父臨亡意欲葬山上恐兒不從
故命言葬我著渚下石墳上狼子曰我由來不奉教
今從語遂盡散家財作石塚積土繞之成一洲長數

百步元康中始為水所壞今石皆如半榻許數百枚
聚在水中恨子是前漢人襄陽太守胡烈有惠化補
塞隄決民賴其利景元四年九月百姓刊石銘之樹
碑於沔水又東偏淺冬月可涉渡謂之交湖兵戎之
交多自此濟晉太康中得鳴石於此水撞之聲聞數
里

沔水又東逕樂山北

今襄陽西北六十
里獨樂山是也

昔諸葛亮好為梁甫吟每所登遊故俗以樂山為名

沔水又東逕隆中

今襄陽府西三十里隆中山是也山下有諸葛亮宅宅西有避暑臺三顧

門

歷孔明舊宅北亮語劉禪云先帝三顧臣於草廬之中咨臣以當世之事即此宅也車騎沛國劉季和之鎮襄陽也與犍為人李安共觀此宅命安作宅銘云天子命我于沔之陽聽鼓鞞而永思庶先哲之遺光後六十餘年永平之五年習鑿齒又為其宅銘焉

水經注集釋訂訛卷二十八

欽定四庫全書

水經注集釋訂訛卷二十九

歸安沈炳巽撰

沔水下

潛水

湍水

均水

粉水

白水

泚水

沔水又東過襄陽縣北

沔水又東逕方山北

方山一名萬山元和志云萬山一名漢皋山在襄陽縣西十一

里與南陽鄧縣分界明一統志萬山在襄陽府山上
城西十里襄沔記以紫蓋山萬山峴山為三峴

有鄒恢碑

按晉書鄒瑩傳鑒之孫恢嘗鎮襄陽甚得
關隴之和降附者動以千計此碑必鄒恢

所立誤作
鄒恢碑

魯宗之所立也山下潭中有杜元凱碑元

凱好尚後名作兩碑並述已功一碑沉之峴山水中

一碑下之於此潭曰百年之後何知不深谷為陵也

晉書杜預傳預好為身後名刻石為二碑紀其勲績
一沉萬山之下一点峴山之上曰焉知此後不為陵
谷乎今云二碑
俱沉水中恐誤 山水曲之隈云漢女昔遊處也故

張衡南都賦曰遊女弄珠於漢臯之曲漢臯即方山

之異名也

沔水又東合檀溪水

明一統志檀溪在襄陽府城西四里漢昭烈乘的盧西走至此溪一

躍而過今已涸

水出縣西柳子山下東為鴨湖湖在馬鞍山東北武

陵王愛其峯秀改曰望楚山

明一統志望楚山在襄陽府城西南八里舊有三

名曰楚山曰馬鞍山曰莫山圖經云秦與齊韓魏攻楚方城秦軍登山以望楚因名一云宋武陵王駿廢

登陟以望駟城改今名

溪水自湖兩分北渠即溪水所導也北

逕漢陰臺西臨流望遠按眺農圃情邈灌蔬意寄漢

陰故因名臺矣

莊子子貢南遊於楚反於晉過漢陰見一丈人方為圃畦鑿隧而入井抱

甕而出灌子貢教之鑿木為犂挈水若抽為圃者又笑曰有機械者必有機事吾非不知羞而不為也

北逕檀溪

上下疑有脫文

謂之檀溪

宋本溪下有水字

側有沙門釋

道安寺即溪之名以表寺目也溪之陽有徐元直崔

州平故宅悉人居故習鑿齒與謝安書云每省家舅

司檀溪

當從宋本作縱目檀溪

念崔徐之友

宋本作文

未嘗不撫膺

躊蹰惆悵終日矣溪水傍城北注昔劉備為景升所

謀乘的盧馬西走墜於斯溪

世語曰備屯樊城劉表禮馬憚其為人不甚信

用曾請備宴會欲因會取備備覺之偽如廁潛遁出
所乘馬名的盧騎的盧走渡襄陽城西檀溪水中溺
不得出備急曰的盧今日厄矣可努力的盧乃一躍
三丈遂得過乘梓渡河中流而追者至以表意謝之
曰何去之速乎 孫盛曰此不然之言備時羈旅客
主勢殊若有此變豈敢晏然終表之世而無覺故乎
此皆世俗妄
說非事實也 西去城里餘北流注於沔一水東南出

應劭曰城在襄水之陽故曰襄陽也是水當即襄水

也城北枕沔水即襄陽縣之故城也 今襄陽縣沿即襄陽故城謂之

壘城在郡治之西 王莽之相陽矣楚之北津戍也今大城西

壘是也其上古鄆都盧羅之地秦滅楚置南郡號此

為北部焉建安十三年魏武平荊州分南郡立為襄

陽郡荊州刺史治邑居隱賑

朱本云當作殷賑薛綜西京賦注云殷賑謂富

也冠蓋相望一都之會也城南門道東有三碑一碑

是晉太傅羊祜碑一碑是鎮南將軍杜預碑一碑是

安南將軍劉儼碑並是學生所立城東門外二百步

劉表墓太康中為人所發見表夫妻其尸儼然顏色

不異猶如平生墓中香氣遠聞三四里中經月不歇

今墳冢及祠堂猶高顯整頓城北枕沔水水中常苦

蛟害襄陽太守鄧遐負其氣果拔劍入水蛟繞其足
遐揮劍斬蛟流血丹水自後患除無復蛟難矣昔張
公遇害亦亡劍於是水後雷氏為建安從事逕踐瀨
溪所雷之劍忽於其懷躍出落水初由是劍後變為

龍

雷次宗豫章記云雷孔章為豐城令於縣掘得二劍一以進司空張華後華遇害此劍飛入襄城水

中孔章臨亡戒其子恒以所留之劍自隨後其子為建安從事經淺瀨其劍忽於腰間躍出遂見一龍相隨而
故吳均劍騎詩云劍是兩蛟龍

何氏云道元與吳均同時安得

引用其詩疑此書後人之附益者多矣

張華之言不孤為驗矣

沔水又逕平魯城南

城魯宗之所築也故城得厥名矣東對樊

顧氏云當作東對樊

城此漏城字

仲山甫所封也漢晉春秋稱桓帝幸樊城百

姓莫不觀有一老父獨耕不輟議郎張溫使問焉父
嘯而不答溫因與之言問其姓名不告而去城周四
里南半淪水建安中關羽圍于禁於此城會沔水泛
溢三丈有餘城陷禁降龐德奮劍乘舟投命於東岡
魏武曰吾知于禁三十餘載至臨危授命更不如龐

德矣城西南有曹仁記水碑杜元凱重刊其後書伐

吳之事也

樊城在縣北三里舊志隄防至切者在襄樊二城蓋二城並峙中流如峽口且唐鄧

之水從白河南注橫截漢流以故波濤激射城堤為害最切

又從縣東屈西南清水從北來注之

襄陽城東有東白沙白沙北有三洲東北有宛口即

清水所入也

清水入漢處名三洲口在襄陽縣東北

沔水中有魚梁洲

龐德公所居士元居漢之陰在南白沙故世謂是地

為白沙曲矣司馬德操宅洲之陽望衡對宇懽情自
接泛舟褰裳率爾休暢豈待還桂拖於千里貢寸心
於永思哉水南有層臺號曰景升臺蓋劉表治襄陽
之所築也言表盛遊於此常所止憇表性好鷹嘗登
此臺歌野鷹來曲其聲韻似孟達上堵吟矣

景升臺
今名呼

鷹臺在府城北二十里宋蘇軾詩莫上呼鷹臺
平生笑劉表李易詩呼鷹復何用臥龍獨不顧

沔水又逕桃林亭東

明一統志襄陽府南六里有桃林
晉桓冲北伐屯軍於此是時食桃

至春其核萌生遂成茂林但秦欽漢人不當先有此
名恐另是一桃林也 錐指曰桃林亭在襄陽縣東南

又逕峴山東山上有桓宣所築城孫堅死於此又有

桓宣碑羊祜之鎮襄陽也與鄒潤甫嘗登之及祜死

後人立碑於故處望者悲感杜元凱謂之墮淚碑

峴山

在襄陽府南七里晉書羊祜傳祜樂山水每風景必造峴山置酒言詠終日不倦常慨然嘆息顧謂從市鄉湛等曰自有宇宙便有此山由來賢達勝士登此遠望如我與卿者多矣皆湮滅無聞使人悲傷如百歲後有知魂魄猶應登此也湛曰公德冠四海道嗣前哲令聞令望必與此山俱傳至若湛輩乃當如公言耳及祜薨襄人感其德立祠刻碑其上歲時饗祭望其碑者莫不流涕杜預因名為墮淚碑

山上

又有征南將軍胡罷碑又有征西將軍周訪碑山下

水中杜元凱碑處

河水又東南逕蔡洲

在府城東北漢水中

漢長水校尉蔡瑁居之故名蔡洲

襄陽耆舊傳蔡瑁字德珪性豪自喜

為魏武所親家在蔡洲上屋宇甚好四牆皆以青石結角婢妾數百人別業四五十處

洲大岸

西有洄湖停水數十畝長數里廣減百步水色常綠

楊儀居上洄楊顯居下洄

襄陽耆舊傳楊儀字威公為蜀相諸葛亮長史亮出

軍儀常規畫分部籌度糧穀不稽思慮須臾便了楊顯字子昭為丞相亮主簿亮自校簿書顯諫曰坐而

論道謂之三公今明公親校簿不亦勞乎及顯死亮泣三日曰掾曹非楊顯於朝中多損益矣與蔡

洲相對在峴山南廣昌里又與襄陽湖水合水上承
鴨湖東南流逕峴山西又東南流注白馬陂水又東
入侍中襄陽侯習郁魚池郁依范蠡養魚法作大陂
陂長六十步廣四十步池中起釣臺池北亭郁墓所
在也列植松篁於池側沔水上郁所居也又作石伏
道引大池水於宅北作小魚池池長七十步廣十二
步西枕大道東北二邊限以高堤楸竹夾植蓮芡覆
水是遊宴之名處也山李倫之鎮襄陽每臨此池未

嘗不大醉而還恒言此是我高陽池故時人為之歌

曰山公出何去往至高陽池日暮倒載歸酩酊無所

知習家池在襄陽府城南八里後漢習郁嘗穿此池依范蠡養魚法中築釣臺臨歿謂其子曰必葬我

近魚池後山簡鎮襄陽每出遊多之池上置酒輒醉名之曰高陽池宋曾子固詩未脫迂疎笑山簡更須

同上習池遊王荆公詩遙想習池寒月夜幾人談笑伴詩翁其水下入沔沔水西

又有孝子墓河南秦氏性至孝事親無倦親沒之後

負土成墳常泣血墓側人有咏蓼莪者氏為泣涕悲

不自勝於墓所得病不能食虎常乳之百餘日卒今

林木幽茂號曰孝子墓也其南有蔡瑁冢冢前刻石
為大鹿狀甚大頭高九尺制作甚工

沔水又東南逕邑城北

習郁襄陽侯之封邑也故曰邑城矣

襄陽者舊傳習
郁字文通為黃

門侍郎封

襄陽公

沔水又東合洞口

水出安昌縣故城東北太父山西南流謂之白水又
南逕安昌故城東屈逕其縣南縣故蔡陽之白水鄉

也漢元帝以長沙卑濕分白水上唐二鄉為舂陵縣

漢志南陽郡舂陵故蔡陽白水鄉上唐鄉師古曰漢記云元朔五年以零陵冷道之舂陵鄉封長沙王子買

為舂陵侯至戴侯仁以舂陵地形下濕上書徙南陽元帝許之以蔡陽白水鄉徙仁為舂陵侯光武

即帝位改為章陵縣置園廟焉

後漢書郡國志章陵故舂陵世祖更名古

今注曰建武十八年使中郎將耿遵築城魏黃初二年更從今名故義陽

郡治也白水又西南流而左會昆水水導源城東南

小山西流逕今山北又西南流逕縣南西流注於白

水水北有白水陂其陽有漢光武故宅基址存焉所

謂白水鄉也

漢光武故宅在棗陽縣東南光武本紀建武三年十月幸春陵祠園廟置酒舊

宅大會故人父老注曰光武舊宅在今隨州棗陽縣東南宅南二里有泉焉張衡所謂龍飛泉也蘇

伯河望氣處也

一作蘇伯阿蘇伯阿望見春陵城

改曰光武之征秦豐幸舊邑置酒極歡張平子以為

真人南巡觀舊里焉東觀漢記曰明帝幸南陽祀舊

宅名校官子弟作雅樂奏鹿鳴上自御塤箎和之以

娛賓客又於此宅矣白水又西合澧水水出於襄鄉

縣東北陽中山西逕襄鄉縣之故城北按郡國志是

南陽之屬縣也澧水又西逕蔡陽縣故城東西南流

注於白水又西逕其城南建武十六年

按後漢書宗室四王傳是

建武十三年封

世祖封城陽王祉世子本為侯國應劭曰蔡

水出蔡陽東入淮今於此城南更無別水唯是水可

以當之川流

宋本作川水

西流苦其不東且淮源岨礙山

河無相入之理蓋應氏之誤耳洞水又西南流注於

沔水

又東過中盧縣東淮水自房陵縣淮山東流注之

今南漳縣

東有中
盧故城

縣即春秋盧戎之國也縣故城南有水出西山山有

石穴出馬謂之馬穴山

今名馬窟山在光化縣東五里

漢時有數百

匹馬出其中馬形小似巴滇馬三國時陸遜攻襄陽

於此穴又得馬數十匹送建業蜀使至有家在滇池

者識其馬毛色云其父所乘馬對之流涕其水東流

一百四十里遷城南名曰浴馬港言初得此馬洗之

於此因以名之亦云乘出沔次浴之又曰洗馬既渡

沔宿處名之曰駢亭然侯水諸蠻北過是水南壅淮

川以周田溉下流入沔

沔水又東南流逕黎丘故城西

黎丘城在今宜城縣東
郡國志南郡印縣有黎

丘城
即此

其城下對繕州秦豐居之故更名秦洲王莽之敗也

秦豐阻兵於黎丘黎丘城在觀城西二里建武三年

光武遣征南岑彭擊豐四年朱祐自觀城淪

按光武
紀建武

四年十一月建義大將軍朱祐率二
將軍圍秦豐於黎丘此淪字當作圍豐於黎丘是也

沔水又南與疏水合水出中廬縣西南東流至即縣

北界

漢志南郡有即縣此之即縣乃即字之譌觀下經文可見

東入沔水謂疏口

也水中有物如三四歲小兒鱗甲如鮮鯉射之不可入七八月中好在磧上自曝膝頭似虎掌爪常沒水中出膝頭小兒不知欲取弄戲便煞人或曰人有生

得者摘其臯厭可以小使名為水唐者也

後漢書郡國志引荆

州記云中廬縣南十五里有陵水東流注沔水中有物如馬甲如鮮鯉不可入七八月中好在磧上自暴膝頭如虎掌爪小兒不知欲取弄戲便殺人或曰生得者摘其臯厭可小小使名曰水廬十道志引襄沔

記作水虎或云鼻厭者
水虎之勢也可為媚藥

又南過邳

音思一作邳

縣東北

元和志本漢邳縣城東臨漢江古誚邳無東言東逼漢江

其地短促也

泗水之左有騎城周迴二里餘高一丈六尺即騎亭

也縣故楚邑也秦以為縣漢高帝十一年封黃極忠

為侯國

史表黃極忠封邳侯

縣南有黃家墓墓前有雙石闕彫

制甚工俗謂之黃公闕黃公名尚為漢司徒泗水又

東逕猪蘭橋橋本名荻蘭

宋本作木蘭

橋橋之左右豐蒿

荻於橋東劉季和大養猪襄陽太守曰此中作猪屎

臭可易名猪蘭橋百姓遂以為名矣

於橋東下有詭
誤疑當作襄陽

太守劉季和於橋東大養猪朱云劉
季和名洪沛國相見襄陽耆舊傳

橋北有習郁宅

宅側有魚池池不假功自然通洫長六七十步廣十

丈常出名魚

沔水又南得木里水會

楚時於宜城東穿渠上口去城三里漢南郡太守王

寵又鑿之引蠻水灌田謂之木里溝逕宜城東而東

北入於沔謂之木里水口也

又南過宜城縣東夷水出自房陵縣東流注之

蠻水發源自房

陵縣界經南漳入宜城西南六十里入漢江

夷水蠻水也桓溫父名夷改曰蠻水

桓溫父名彝此云夷蓋嫌音之

同夷水導源中廬縣界康狼山山與荆山相隣其水

東南流歷宜城西上謂之夷溪又東南逕羅川城故

羅國也又謂之鄢水春秋所謂楚人伐羅渡鄢者也

夷人又東南流與零水合零水即汙

一作汙疑作汙

水也上

通梁州沒陽縣之默城山司馬懿出沮之所由其水
東遷新城縣之汭鄉縣縣分房陵邱謂之汭水又東
歷軫鄉謂之軫水晉武帝平吳割臨沮之北鄉中廬
之南鄉立上黃縣治軫鄉汭水又東歷宜城西山謂
之汭溪東流合於夷水謂之汭口也與夷水亂流東出
謂之淇水遷蠻城城南疑當作南在宜城南三十里春
秋若敖自羅敗退及鄢亂次以濟淇水是也夷水又
東注於沔昔白起攻楚引西山谷水即是水者也舊

塌去城一百許里水從城西灌城東入注為淵今尉

斗陂是也

在荊州府當陽縣東北八十里

水潰城東北角百姓隨水

流死於城東者數十萬城東皆臭因名其陂為臭池
後人因其渠流以結陂田城西陂謂之新陂覆地數
十頃西北又為上門陂從平路渠以北木蘭橋以南
西極土門山東跨大道水流周通其水自新陂東入
城城故鄢郢之舊都秦以為縣漢惠帝三年改曰宜
城其水歷大城中逕漢南陽太守秦頡墓北墓前有

二碑頡郡人也以江夏都尉出為南陽太守逕宜城

中見一冢

疑當作家

東向頡住車視之曰此居處可作冢

後卒於南陽喪還至昔住車處車不肯進故吏為市

此宅葬之孤墳尚整冢前有二碑城南有宋玉宅

在荆

州府歸州舊治東五里

玉邑人雋才辨給善屬文而識音也其

水又逕金城前縣南門有古碑猶存其水又東出城

東注臭池臭池溉田陂水散流又入朱湖陂朱湖陂

亦下灌諸田餘水又下入木里溝木里溝是漢南郡

太守王寵所鑿故渠引鄆

原本
譌鴈

水也灌田七百頃白

起渠溉三千頃膏良肥美更為沃壤也縣有太山山

下有廟漢末多士其中

何氏改名
士居其中

刺史二千石卿長

數十人朱軒華蓋同會於廟下荊州刺史行部見之

雅嘆其盛號為冠蓋里而刻石銘之此碑於永嘉中

始為人所毀其餘文尚有可傳者其辭曰峨峨南岳

烈烈離明寔敷儁又君子以生惟此君子作漢之英

德為龍光聲化鶴鳴此山以建安三年崩聲聞五六

十里雉皆屋雒縣人惡之以聞侍中龐季云山崩川竭國土將亡之占也十三年魏武平荊州沔南彫散

沔水又逕都縣故城南

故城在今宜城縣東南

古郢子之國也秦楚之間自商密遷此為楚附庸楚滅之以為邑縣南臨沔津津南有石山上有古烽火

臺縣北有大城即楚昭王為吳所迫自郢徙都之所

謂鄢郡

疑是郡

盧羅之地也

左傳云吳人敗楚舟師楚國大惕于是乎遷都而改

紀其政秦以為縣

沔水又東教水注之

教水在竹山
縣西一十里

水出新市縣東北

新市縣今為京山縣境
其故城在縣南三十里

又西南

南下

疑有太陽山西南流逕新市縣北又西南而右合枝

水水出大洪山而西南流逕襄陽郡疑是縣界西南

逕秋疑是城東南左注教水教水又西南流注於沔

寔胡氏作是曰澗口沔水又南胡氏作東逕石城西石城即今陸安府治

漢水自宜城南流一百七十里至府濁流盤洑最為可虞城因山為固晉太傅羊

祜鎮荊州立晉惠帝元康九年分江夏西部置竟陵

郡治此

沔水又東南與白水合

白水在京山縣北一十里

水出竟陵縣

竟陵縣即今景陵縣故城在今安陸府南

東北耶屈山

明一統志

作聊屈山在京山縣東三十里

一名盧屈山西流注於沔魯定公四

年吳師入郢昭王奔隨濟於成白謂是水者也又東

過荆城東

沔水自荆東南流逕當陽縣

今屬荊州府

之章山東

山上有故城太尉陶侃伐杜曾所築也禹貢所謂內

方山至於大別者也既瀕帶沔流寔會尚書之文矣

沔水又東右會權口

水出章山東南流逕權城北

今荆門州東南有權城

古之權國

也春秋魯莊公十八年楚武王克權權叛圍而殺之

遷權於那處是也

按左傳楚武王克權使鬬緡尹之以叛圍而殺之遷權於那處別版

者乃緡也道元所引似失本意且事亦不在此時乃十八年傳中追述之耳

東南有那口

城

杜預曰權國名南郡當陽縣東南有權城那處是地南郡編縣東南有那口城

權水又東

入於沔

沔水又東南與陽口合

陽水即楊水漢志漳水東至江陵入陽水陽水入沔是為陽口

古之漳澗也

水上承江陵縣赤湖

明一統志在今荊州府西北一十里相傳晉桓元挾帝西幸劉

毅等追襲敗元於此血流水赤故名

江陵西北有紀南城

明一統志紀南城在荊州

府北一十里史記注楚都於郢今江陵縣北紀南城是至平王更城郢在江陵東北故郢城是荊州記昭

王十年吳通漳水灌紀南入赤湖進灌郢城則郢與紀南為二城矣

楚文王自丹陽徙

此平王城之班固言楚之郢都也城西南有赤坂置

置下有瀆水東北流入城名曰子胥瀆蓋吳師入郢

所開也謂之西京湖又東北出城西南注於龍陂陂

古天井水也廣圓二百餘步在靈溪東江堤內水至

淵深有龍見於其中故曰龍陂陂北有楚莊王釣臺

在江陵縣西高三丈四尺南北六丈東西九丈陂水

又逕郢城南東北流謂之楊水又東北路曰湖水注

之

當作東北流
白湖水注之

湖在大港北巷

疑作港

南曰中湖南堤

下曰昏官湖三湖合為一水東通荒谷荒谷東岸有

治父城春秋傳曰莫敖縊於荒谷群帥囚於治父謂

此處也春秋水盛則南通大江否則南迄江堤北逕
方城西方城即南蠻府也又北與三湖會故盛弘之
曰南蠻府東有三湖源同一水蓋徙治西府也宋元嘉
中通路自湖下注楊水以廣運漕楊水以東歷天井
北井在方城北里餘廣員二里其深不測井有潛室
見輒兵兵下疑
有脫文西岸有天井臺因基舊堤臨際水湄
遊憩之佳處也楊水又東北流得東赤湖水口湖周
五十里城下陂池皆來會同湖東北有大置疑
衍臺高

六丈餘縱廣八丈一名清暑臺秀宇層明通望周博
遊者登之以暢遠情楊水又東入華容縣有靈港水
西通赤湖水口地多下湖周五十里城下陂池皆來
會同又有子胥瀆蓋入郢所開也水東入離湖湖在
縣東七十五里國語所謂楚靈王闕為石郭陂漢以
象帝舜者也今國語無此石郭象舜語湖側有章華臺臺高十丈
基廣十五丈左丘明曰楚築臺於章華之上韋昭以
為章華亦地名也王與伍舉登之舉曰臺高不過望

國之氛祥大不過容宴之俎豆蓋譏其奢而諫其失

也

明一統志章華臺有二一在荊州府城外沙市一在監利縣東北皆傳以為楚靈王所築其在監利

者又名三休臺按曰崔王使使之楚楚王誘之饗於章華之臺三休乃至臺名三休疑取之此言此

瀆靈王立臺之日漕運所由也其水北流注於楊水

楊水又東北與祥溪水合水出江陵縣北蓋諸池散

流咸所會合積以成川東流逕魯宗之壘南當驛路

水上有大橋隆安三年桓元襲殷仲湛於江陵仲湛

北奔縊於此橋祥溪又東注船宮湖湖水又東北入

女觀湖湖水又東入於楊水楊水又北逕竟陵縣西
又北納中吐柘柘水即下楊水也中水出縣東一百
九十里西逕中城下城下置中水戍晉元熙二年竟
陵郡上中水戍山得銅鐘七口言之上府中水又西
逕竟陵縣北西逕楊水謂之中口水西有古竟陵大
城古鄖國也鄖公辛所治所謂鄖鄉矣昔白起拔郢
東至竟陵即此也秦以為縣王莽之守平矣世祖建
武十三年更封劉隆為侯國城傍有甘魚陂左傳昭

公十三年公子黑肱為令尹次於魚陂者也楊水又
北注於沔謂之楊口中夏口也曹太祖之追劉備於
當陽也張飛按矛於長坂備得與數騎邪趣漢津遂
濟夏口是也沔水又東得瀝口其水承大瀝馬骨諸
湖水周三四百里及其夏水來同浩胡氏引若滄海洪
潭疑是巨浪縈連江沔故郭景純江賦云其傍則有
朱瀝丹灤是也

又東南逕江夏雲杜縣東中夏水從西來注之

雲杜縣
今安陸

治府

即堵口也

禹貢雒指云通典復州沔陽縣有漢雲杜縣故城在縣西北有夏水沔水今沔陽州

南長夏河即夏水自監利縣流徑州南四十里與潛江縣分水又東北至於漢堵口今失其處蓋為水所湮也漢水在州北一百里自潛江流入與景陵分水又東入漢川縣界 為中夏水縣故

邳亭左傳所謂若敖娶於邳是也禹貢所謂雲土夢作又故滕取名焉縣有雲夢城東北

沔水又東逕左桑

昔周昭王南征船人膠舟以進之昭王渡沔中流而沒

死於是水齊楚之會齊侯曰昭王南征之不復寡人
是問屈完曰君其問諸水濱庾仲雍言杜老云百姓
佐昭王喪事於此成禮而行故曰佐喪左桑字失體
耳

沔水又東合區

一作亮水口

水北承亮湖南達於沔

沔水又東得合驛口

庾仲雍言須導杜耆舊云朝廷驛使合王喪於是因

以名焉今須導村正有大飲口言昭王於是殯飲矣
沔水又東謂之橫桑

言得昭王喪處也

沔水又東謂之鄭潭

言鄭武公與王同溺水於是今謂世數既懸為不近
情矣斯乃楚之鄭鄉守邑大夫讚公言故世以為鄭
公潭耳

沔水又東得死沔

何氏云死沔當
是河之祐瀆

言昭王濟自是死沔故有死沔之稱王尸豈逆流乎
但千古芒昧難以昭知推其事類似是而非矣

沔水又東與力口合

力口在今景陵縣東南

有澠水出竟陵郡新陽縣西南河

疑有訛字

地山東流逕

新陽縣南縣治雲杜故城分雲杜立澠水又東南流
注宵城縣南大湖又南入於沔水是曰力口

沔水又東南湓水入焉

元和志安陸縣湓水故清發水也西北自隨縣流入注於沔今

在漢陽縣西北

沔水又東逕沱水口水南通縣之大白湖湖水東南

通江又謂之沱口

沔水又東逕沱陽縣北

沱陽廢縣在今漢陽府西六十里臨嶂山下晉置後廢

處沱水之陽也沔水又東逕林郭故城

林郭故城在臨嶂山上

北晉建興二年太尉陶侃為荊州鎮此也

又南至江夏沙羨縣北

今為武昌府治及諸屬縣

南入於江

庾仲雍曰夏口一曰沔口矣尚書禹貢云漢水南至

大別入江春秋左傳定公四年吳師伐郢楚子常濟

漢而陳自小別至於大別京相璠春秋土地名曰大

別漢東山名也

大別山在漢陽府城東北漢江右三國南北之際恒為必爭之地一名翼

際山一名魯山舊有魯肅祠因名

在安豐縣南杜預釋地曰二別近

漢之名無緣乃在安豐也

禹貢錐指曰大別山在漢陽府城東北半里漢水

西岸左傳小別至於大別杜預云禹貢漢水至大

別南入江然則此二別在江夏界水經注江水東

逕魯山南古翼際山也地說曰漢與江合於衡北

翼際山傍者也山上有吳江夏太守陸渙所治城

蓋取二水之名地理志曰夏水過郡入江故曰江

夏也舊治安陸吳乃徙此山左即沔口矣沔左有

却月城故曲陵縣後乃沙羨音夷縣治也元和志魯

山一名大別山在漢陽縣東北一百步其山前枕

蜀江北帶漢水山上有吳將魯肅神祠渭按禹貢

大別山杜元凱已知在江夏不在安豐酈氏亦主

杜說而終不能指魯山為大別至唐人始能言之

左傳定公四年吳子伐楚舍舟於淮汭自豫章
與楚夾漢史皇謂子常必速戰乃濟漢而陳自小
別至於大別三戰子常知不可欲奔史皇止之十
一月庚辰陳於柏舉吳師大敗楚師子常奔鄭孔
疏云小別當在大別之東何則子常從小別與吳
戰退而至大別明自東而漸西也今按豫章杜注
云漢東江北地自豫章與楚夾漢謂吳軍漢東楚
軍漢西也子常濟漢而陳自小別至於大別言其

師衆為長陳自西及東若此其遠兩軍合戰則自
大別以東尋傳文無從小別與吳戰退而至大別
之事也小別當在大別之西孔說正相反今漢川
縣東南有甌山即小別山元和志云小別山在漢
川東南五十里

唐漢川縣在今漢川縣北
三十里故里數有不同耳

索隱云

大別山土人謂之甌山蓋承孔疏之誤二別相去
一百二十餘里

案地說言漢水東行觸大別之陂南與江合則與尚

書杜預相符但今不知所是矣

禹貢錐指云以今輿地言之漢水自均州北又東

南逕光化縣西南

光化襄陽府西北一百八十里水去縣十五里

又東南

逕穀城縣東北

穀城在府西北一百二十里水去縣二十五里

又東南逕

襄陽縣北

縣為襄陽府治東南三十里漢水中有龍尾洲縣志云漢水重濁與大河相似

襄陽實當其衝為害最劇自唐以來皆築隄連城以防潰決

又東南逕宜城縣

東

宜城府東南一百二十里水去縣四里

又南逕鍾祥縣西

鍾祥為安陸府

治又南逕荊門州東

荊門府西九十里水去州一百二十里

又東南

遷京山縣西南

京山府東一百五十里

又東遷潛江縣北

潛江

府南少東二百十里水去縣二十里

又東遷景陵縣南

景陵府東南二百十里水

去縣五十里

又東遷沔陽州北

沔陽府西少東三百三十里水去縣一百里州

志云漢水由荊門州界折而東大小羣川咸匯焉勢盛流濁浸淫蘆泆為患無已而潛江地居汗下遂為眾水之壑一望瀰漫無復涯際漢水經其間重湖浩渺經流支川不可辨也蓋漢水為湖北之害而襄郢二州為甚潛江又承襄郢之委流當漢江曲折迴合之處潛為大澤勢不能免矣而景陵沔陽又潛江之委流也今沔陽四境唯湖陂連亘幾數百里皆為漢水所匯蓋漢水性曲往往十里九灣語曰動莫如濟曲莫如漢郢沔之間波流迴還自必潛為藪澤小民見填淤之利復從而隄防

之為民牧者人不講於節宣之宜疏濬之理歲月之間苟卒無事大水時至則委之洪濤中耳童承叙曰漢水至濁與江湖水合其流必澄故常填淤而沮澤之區因成沃壤民漸芟別壑為阡陌又因其地之高下修隄防以障之大者廣輪數十里小者十餘里謂之曰垸其不可隄者悉棄為菜蕪昔時垸必有長統丁夫主修葺其後法久弊滋修不以時垸愈多水愈迫客隄愈高主堤愈卑故水至不得寬緩湍怒迅激勢必衝蓄主堤先受其害客堤隨之泛濫洶湧患為巨浸矣

又東逕

漢陽縣北

縣為漢陽府治水去縣三里

又東至大別山折而南

是為漢口經所謂過三澁至大別南入於江者也

隄防考云舊時漢水從黃金口入排沙口東北折抱牯牛洲至魯公口又西南轉北至郭師口對岸

曰襄河口約長四十里漢水徑從此下而故道遂淤今魚利畧存不通舟楫俗呼為襄河以上流自襄陽來也按漢水本東行觸大別之陂而南回入江今則自鄖師口以上決而東遶大別山後入江非復古之夏洳矣

漢志云東漢水一名沔過江夏謂之夏

水入江又云沮水南至沙羨南入江過郡五

武都漢中

南陽南行四千里蓋曲莫如漢故其所行有若是

之遠也

沔水與江合流又東過彭蠡澤

尚書禹貢滙澤

原本

也鄭元曰滙回也漢與江鬪轉

東成其澤矣

尚書古文解曰彭蠡今鄱陽湖也納江西饒信州諸水自南康軍星子縣東北

至湖口縣入江朱子全書曰彭蠡之為澤寔在大江之南然以地勢北高而南下故其入於江也反為江水所遏而不得遂因却而自潄以為是瀾漫數十里之大澤尚書解曰江漢之水相合而其流浸大於是東流於彭蠡大澤水既鍾於彭蠡則有所迴旋曲折不至於泛濫漂悍以衝突下流之勢故東為北江入於海也蓋先為之滙而後為之歸也黃潤玉書解曰叙漢江皆言東者主岷嶓居西而云非指曲折為文也禹貢集解曰三江相會而南不能以敵中北西來之勢故中北過南而南相與迴旋而為一大澤者其來久矣今禹本其所由有澤之因故歸之於漾而為之言曰東滙澤為彭蠡而於江亦曰會於滙耳其實彭蠡一澤三江之水為之也說者未有發明之義王充耘讀書管見曰江漢二水勢均力敵皆能自達

於海者也故尚貞雖紀其合流仍各見其首尾紀其合流故於漢水言南入於江江漢朝宗於海各見其首尾故於漢水言東迤北會為滙東為中江入於海彭蠡於江水則言東迤北會為滙東為中江入於海彭蠡固江漢之所滙者也今春月江水暴漲則滙而入湖蓋江流浩渺而其下東以小孤山水道狹甚其勢不得逆流而入此澤故有發舟湖口無風而一夕達鄱陽之安仁者問其故乃舟乘逆流行甚迅速猶隨潮而上者也故江水之滙衆所共知今乃疑之顧弗深考耳且謂漢自大別入江合流已七百餘里安能復識其滙澤者為漢水邪亦可謂膠固之甚者矣夫單叙漢水源流則其勢不得不以漢為主但既云南入江則東滙澤為彭蠡即江漢共滙可知矣不成曰南入於江東與江共滙澤為彭蠡然後為明白邪又謂彭蠡在大江之南當曰南滙不當曰東滙滙既在南則當曰北為北江不當曰東為北江其論南北反

庚幾為可笑蓋江漢兩水皆發源西蜀而東流入海獨漢水到大別入江則折而南流與江相合仍舊東流而滙為彭蠡又東流為北江以入海其東西南北以天下大勢論不主一江南北而言也今若欲改云南滙彭蠡則是南流入江之後又南滙彭蠡則漢水當逆流向洞庭矣滙澤之後不云東為北江而云北為北江則漢又當決破安慶橫入淮河矣

又東北出居巢縣南

秦置居巢縣即今廬州府無為州之巢縣界也

古巢國也湯伐桀桀奔南巢即巢澤也尚書周有巢伯來朝春秋文公十二年夏楚人圍巢巢羣舒國也舒叛故圍之永平元年漢明帝更封菑邱侯劉般為

侯國也江水自濡須口

在巢縣治南一名天河水俗呼為馬尾溝源出巢湖東流

經亞父山又東北注於江

又東左會柵口水遵巢湖

巢湖在今無為州巢縣西

一十五里一名焦湖周圍四百餘里港汊大小三百六十占合肥舒城廬江巢四邑之境

東逕烏

上城北又東逕南譙僑郡城南又東絕塘逕附農山

北又東左會清溪水水出東北馬子硯

疑訛當是岷

之清

溪也東逕清溪城南屈而西南流歷山西南流注柵

水謂之清溪口

在六安州東六十里

柵水又東左會白石山水

水發白石山西逕李鵲城南西南注柵水柵水又東南

積而為竇湖中有洲湖東有韓縱山山上有城山北湖

水東出為後塘北湖湖南即塘也塘上有潁川僑郡

故城也湖

疑

竇湖水東出謂之湖竇口湖水東出逕

刺史山北歷韓縱山南逕流二山之間出王武子北

城城在刺史山上湖水又東逕右塘穴北為中塘塘

右四水中水出格虎山北山上有虎山有郭僧坎城

水北有趙祖悅城並故東關城也昔諸葛恪帥師作

東興堤以遏巢湖傍山築城使將軍全端留畧等各

以千人守之魏遣司馬昭督鎮東諸葛誕率衆攻東關三城將毀堤遏諸軍作浮梁陳於堤上分兵攻城恪遣冠軍丁奉等登塘鼓譟奮擊朱異等以水軍攻浮梁魏征東胡遵軍士爭渡梁壞投水而死者數千塘即東興堤城亦關城也柵水又東南逕高江產城南胡景城北又東南逕張祖禧城南東南流屈而北逕鄭衛尉城西魏事已漏久難用取悉推舊取新略究如此又北委折蒲浦出焉柵水又東南流注於大

江謂之柵口水

又東過牛渚縣南又東至石城縣

漢置石城縣今江南池州府貴池縣是也

經所謂石城縣者即宣城郡之石城縣也

石城漢志屬丹陽郡

晉以後屬宣城郡

牛渚在姑熟烏江兩縣界中也

姑熟今太平府當塗

縣烏江在今和州蓋江水先經無為州然後至和州境也

於石城東北減五百許

里安得逕牛渚而方界石城也蓋經之謬誤也

胡云水經

此後一注多誤

分為二其一東北流其一又過毘陵縣北為北江

地理志曰毘陵縣

今為常州府治

舊會稽之屬縣丹徒縣也

北二百步有故城本毘陵郡治也舊去江三里岸稍

毀遂至城下城北有揚州刺史劉繇墓淪於江江即

北江也經書在北江則可又言東至餘姚則非考其

逕流知經之悞矣地理志曰江水自石城東出逕吳

國南為南江江水自石城東入為貴口東逕石城縣

北晉太康元年隸宣城郡東合天溪溪水首受江北

逕其縣故城東又北入南江

按漢志以分江水繫石城南江繫吳縣至道元

始貫穿
為一條

南江又東與貴長池水合

水出縣南郎山北流為貴長池池水又北注於南江
南江又南東逕宣城之臨城縣南

又東合注湮水

按吳分漢陵陽德二縣地置臨城縣其廢址在今青陽縣南韋昭云湮水

出燕湖

南江又東與桐水合

按桐水出廣德州西南白石山西北流逕建平縣南蓋即舊入南江

之處左傳所謂桐汭也晉時南江已湮故杜預曰入丹陽湖今桐水自建平界又西北入高淳界注丹陽湖也

又東逕安吳縣

安吳故城在今寧國府旌德縣西十五里俗稱為沙城本晉縣屬宣城郡

隋省安吳南陽二縣入涇縣

號曰安吳溪又東旋溪水注之水出

陵陽山

陵陽山在寧國府城內岡巒盤屈孤峯秀拔為一郡之鎮

下逕陵陽縣西

為旋溪水昔縣人陽子明釣得白龍處後三年龍迎

子明上陵陽山山去地千餘丈後百餘年呼山下人

上山半與語谿中子安問子明釣車所在後二十年

子安死山下有黃鶴栖其冢樹鳴常呼子安故縣取

名焉

子明事具列仙傳

晉咸康四年改曰廣陽縣漢水又北

合東溪水出南里山北逕其縣東桑欽曰淮水出
縣之東南北入大江其水又北歷蜀由山又北左合
旋溪北逕安吳縣東晉太康元年分宛陵立縣南有
落星山山有懸水五十餘丈下為深潭潭水東北流
左入旋溪而同注南江之北即宛陵縣界也

今屬寧國府治

南江又東逕寧國縣南

今屬寧國府

晉太康元年分宛陵置南江又東逕故彰縣南安吉
縣北光和之末天下大亂此保險守節漢朝嘉之中平

二年分故彰之南鄉以為安吉縣

故彰今為江南廣德州安吉漢分故

彰南鄉置今為州屬浙江湖州府

縣南有釣頭泉懸湧一仞乃流於

川川水下合南江

南江又東北為長瀆歷河口

南江東注於具區謂之五湖口五湖謂長塘湖太湖

射貴湖

湖上湖二字

漚湖也郭景純江賦曰注五湖以漫

漚蓋言江水經緯五湖而包注太湖也是以左丘明

述國語曰越伐吳而戰於五湖是也又云范蠡滅吳

返至五湖而辭越斯乃太湖之攝通稱也虞翻曰是湖有五道故曰五湖韋昭曰五湖今太湖也尚書謂之震澤爾雅以為具區方圓五百里湖有芑山春秋謂之夫椒山有洞室入地潛行北通瑯琊東武縣俗謂之洞庭旁有青山一名夏架山山有洞穴潛通庭庭上疑有洞字 山上有石鼓長丈餘鳴則有兵故吳記曰太湖有芑山在國西百餘里居者數百家山弓弩材旁有小山山有石穴南通洞庭深遠莫知所極三苗之

國左洞庭右彭蠡今宮亭湖也太湖之洞庭對彭蠡則左右可知也余按二湖俱以洞庭為目者亦分為左右也但以趣矚為方耳既據三苗宜以湘江為正是故郭景純之江賦云爰有苞山洞庭巴陵地道潛達傍通幽岫窈窕山海經曰浮玉之山北望具區苔水出於其陰北流注於具區謝康樂云山海經云浮玉之山在句餘東五里便是句餘縣之東山乃應入海具區今在餘姚烏道山北何由北望具區也以

為郭於地理甚昧矣言

疑

洞庭南口有羅浮山高

三千六百丈羅浮山東石樓下有兩石數扣之清越所謂神鉦者也事備羅浮山記會稽山宜直湖南又有山陰溪水入焉山陰縣西四十里有二溪東溪廣一丈九尺冬煖夏冷西溪廣三丈五尺冬冷夏煖二溪北出行三里至徐村合成一溪廣五丈餘而溫涼又雜蓋山海經所謂茗水也北逕羅浮山而下注於太湖故言出其陰入於具區也湖中有大雷小雷三山

亦謂之三山湖又謂之洞庭湖楊修五湖賦曰頭首

無錫足蹄松江負烏程於背上懷大吳以當胷咋嶺

按五湖賦作咋 崔嵬穹窿紆曲大雷小雷湍波相逐

用言湖之苞極也太湖之東吳國西十八里有咋嶺

山俗說此本在太湖中禹治水移進近東又西南

從續圖經校改禹治水 有兩小山皆有石如卷笮云

禹所用牽山也太湖中有淺地長老云是笮嶺山蹠

自此以求圖經作差深言是牽山之溝此山去太湖

三十餘里

東則松江出焉

上承太湖更逕笠澤在吳南松江左右也國語曰越
伐吳吳禦之笠澤越軍江南吳軍江北者也虞氏曰
松江北去吳國五十里江側有丞胥二山山各有廟
國南五十里魯哀公十三年越使二大夫疇無餘謳
陽等伐吳吳人敗之獲二大夫大夫死故立廟於山
上號曰丞胥二王也胥山上今有壇石長老云胥神

所治也下有九折路南出太湖闔閭造以遊胥

胥上疑有

姑之臺以望太湖也松江自湖東北流逕七十里

江水岐分謂之三江口

何氏從朱長吳郡圖經續記校
江水岐分二句乃鄴注非經文

吳越春秋稱范蠡去越乘舟出江之口入五湖之中

者也此亦別為三江五湖雖稱相亂不與職方同庾

仲初揚都賦注曰今太湖東注為松江下七十里有

水口分流東北入海為婁江東南入海為東江與松

江而三也

何氏云而三也下圖經續記有非
為貢之三江六字疑亦鄴氏原文吳記曰

一江東南行七十里入小湖為次溪自湖東南出謂之為谷水吳記曰谷水出吳小湖逕由卷縣故城下

今為嘉興府治

神異傳曰卷縣秦時長水縣也始皇時縣有

童謠曰城門當有血城陷沒為湖有老嫗聞之憂懼日往窺城門門侍欲縛之嫗言其故嫗去後門侍煞犬以血塗門嫗又往見血走去不敢顧忽有大水長欲沒縣主簿令幹入白令令見幹曰何忽作魚幹又曰明府亦作魚遂乃淪陷為谷矣因目長水城水曰

谷水也吳記曰谷中有城故由卷縣治也即吳之柴
辟亭故就李鄉樛李之地秦始皇惡其勢王令囚徒
十餘萬人汙其土表以汙惡名改曰囚卷亦曰由卷
也吳黃龍四年有嘉禾生卷縣改曰禾興後太子諱
和改為嘉興春秋之樛李城也谷水又東南逕嘉興
縣城西谷水又東南逕鹽官縣故城南舊吳海昌都
尉治晉太康中分嘉興治太康地道記吳有鹽官縣
樂資九州志曰縣有秦逕山秦始皇逕此美人死葬

於山上山下有美人廟谷水之右有馬罽城故司鹽

都尉城吳王濞煮海為鹽於此縣也是以漢書地理

志曰縣有鹽官東出五十里有武原鄉故越地也秦

於其地置海鹽縣今屬嘉興府地理志曰縣故武原鄉也

後縣淪為柘湖又徙治武原鄉改曰武原縣王莽名

之辰武按漢志作辰武漢安帝帝下疑有時字武原之地又淪為湖

今之當湖也後乃移此縣南有秦望山秦始皇所登

以望東海故山得其名焉山谷水於縣出為散一作浦

以通巨海光熙元年有毛民三人集於縣蓋汜於風也

又東至會稽餘姚

今屬紹興府

東入於海

謝靈運云具區在餘姚然則餘暨是餘姚之別名也
今餘暨之南餘姚西北浙江與浦陽江同會歸海但
水名已殊非班固所謂南江也郭景純曰三江者岷
江松江浙江也然浙江出南蠻中不與岷江同作者
述誌多言江水至山陰

今屬紹興府

為浙江今南江枝分

歷烏程縣

今屬湖州府

南通餘杭縣

今屬杭州府胡云當作餘姚

則與

浙江合故闕駟十三州志曰江水至會稽與浙江合

雖指云班志所謂南江者實松江也闕駟之所謂江水至會稽與浙江合者即分江水水經謂之南江者也或以為北江大謬鄭元篤信班固故不能無疑於此浙江自臨平湖南通浦

陽江又於餘暨東合浦陽江自秦望分派東餘姚縣又為江也東與車箱水合水出車箱山乘高瀑布四十餘丈雖有水旱而澍無增減

禹貢雖指云正義曰地理志云會稽吳縣故周泰

伯所封國也具區在西古文以為震澤蘇氏曰豫章江入彭蠡而東至海為南江岷江江之經流會彭蠡以入海為中江漢自北入江會彭蠡為北江三江入海則吳越始有可宅之上而水所鍾者獨震澤而已曾氏曰具區之水多震而難定故謂之震澤震即三川震之震若今湖翻底定者言底於定而不震蕩也易氏曰三江自入於海不通震澤而經何以言震澤底定蓋江湖在今日雖無相通

之勢而當時洪水實有橫流之理想其際震澤與

江水莽為一壑自大禹䟽導而三江入海震澤乃

底於定自然之勢也

見王天與尚書纂傳

渭按蘇氏三江之

說人或疑之及閱徐堅初學記引鄭康成書注以

證三江曰左合漢為北江右會彭蠡為南江岷江

居其中則為中江故書稱東為中江者明岷江至

彭蠡與南北合始得稱中也始知蘇氏所說東漢

時固已有之馬中錫云斯言也百世以俟聖人可

也金吉甫云大江之南西偏莫大於彭蠡東偏莫大於震澤二患既平則揚之上田皆治矣故特舉二澤以見揚之告成若其南偏率是山險浙亦山谿計不勞施功故餘不書也 禹貢三江之不明

誤自班固始漢志會稽吳縣下云南江在南東入

海毘陵縣下云北江在北東入海

今本漢書脫上一北字此據宋

本增入後漢志亦云北江

丹陽蕪湖縣下云中江出西南東至

陽羨入海皆揚州川也蓋北江為經流至江都入

海中江由吳松入海南江合浙江入海皆北江之
枝瀆也蘓水明言漢自彭蠡東為北江江自彭蠡
東為中江誠如班氏所言則蕪湖之中江何以知
為江水之所分毘陵之北江何以定為漢水之所
獨乎以此當禹貢三江之二雖愚者亦知其非矣
孔傳於本經云言三江已入致定為震澤蘓漾傳
云自彭蠡江分為三入震澤遂為北江而入海正
義曰言三江共入震澤出澤復分為三此水遂為

北江而入於海鄭元以為三江既入入於海不入
震澤也導江傳又云有北有中南可知正義引漢
志三江以證之渭按班固所說南北中之名雖同
而實非禹貢之三江孔傳說與之合又欲諱其所
自出掩抑摧藏半吞半吐其為偽撰無疑或曰傳
果出魏晉間手曷不用鄭注曰此說起自東漢代
棘下生作傳不得入東漢語并不得全錄班志君
當亮彼苦心也漢志丹陽石城縣下云分江水首

受江東至餘姚入海過郡二行千二百里

石城縣故城在

今池州府貴池縣西七十里

此即南江之源委過郡二謂丹陽

會稽也其在吳縣南者即吳松江乃中江之下流
班氏不知分江水至餘姚入海者即古之南江遂
誤以松江當之耳

江水又東逕黃橋下

臨江有漢蜀郡太守黃昌宅橋本昌創建也昌為
州書佐妻遇賊相失後會於蜀復修舊好江水又東

遷緒山南虞翻嘗登此山四望示子孫可居江北世

有祿位居江南則不昌也然住江北者相繼代興時

有江南者輒多淪替仲翔之言為有

此下漏徵矣江水又遷六字當

從朱本增入

官倉倉即日南太守虞國舊宅號曰西虞以

其兄光居縣東故也是地即其雙鴈送故處

孔曄會稽記云

昔虞翻嘗登此山望四郭誠子孫曰可留江北居後世祿位當過於我聲名不及耳然相繼代興居江南必不昌又曰虞國為日南太守有惠政出則雙雁隨軒及還會稽雁亦隨焉其卒也猶棲於墓不去

江水入東遷餘姚縣故城南

縣城是吳將朱然所築也南臨江津北背巨海夫子
所謂滄海浩浩萬里之淵也縣西北會稽一百四十
里因其句餘山宋本作句章山以名縣山在餘姚之南句章
之北也江水又東逕穴湖塘湖水沃其一縣並為良
疇矣

江水又東注於海

是所謂三江者也故子胥曰吳越之國三江環之民
無所移矣但東南地卑萬流所湊濤湖泛決觸地成

川枝津交渠世家分夥故川舊瀆難以取悉雖粗依
縣地緝綜所纏亦未必一得其實也

潛水出巴郡宕渠縣

潛水蓋漢水枝分潛出故受其稱耳今受

朱云當作爰

有

大穴潛水入焉通置山下西南潛出謂之伏水或以
為古之潛水鄭元曰漢別為潛其穴本小水積成澤
流與漢合大禹自廣漢疎通即為西漢水也故書曰
沱潛既道劉澄之稱白水入潛然白水與羌水合入

漢是猶漢水也縣以咸熙中分已

疑作巴

立宕渠郡蓋

古實國也今有實城縣有渝水夾水上下皆實民所

居漢祖入關從定三秦其人勇健好歌儻高祖愛習

之今巴渝舞是也縣西北有不曹

漢志巴郡宕渠縣注作徐曹

水

南遷其縣下注潛水縣有車騎將軍馮緄桂陽太守

李溫冢二子之靈常以三月還鄉水暴長郡縣吏民

莫不於水上祭今所謂馮李也

又南入於江

庾仲雍云墊江有別江出晉壽縣即潛水也其南源取巴西是西漢水也

湍水出鄠縣北芬山南流過其縣東又南過冠軍縣東

漢志鄠縣冠軍俱屬南陽郡鄠縣故城在今南陽府內鄉縣東冠軍故城在今鄧州北湍水在州城北三里

湍水出弘農畋翼望山水甚清徹東南流逕南鄠縣

故城東史記所謂下鄠也漢武帝元朔元年封左將

軍同

按史表元封元年封左將黃同為下鄠侯今云元朔誤左將軍同亦誤按索隱曰西南夷傳甌

駱將左黃同則左是姓恐誤漢表云左將黃同則左將是官不疑湍水又南菊水注

之水出西北石澗山芳菊溪亦言出祈谷

漢志作祈谷蓋

溪澗之異名也

漢志弘農郡祈縣黃水出黃谷鞠水出祈谷俱東至鄆入湍水師古曰鞠

水即今所謂菊潭也明一統志菊潭在內鄉縣西北源出祈谷東石澗山其水重於諸水傍生甘菊水極甘馨有數十家惟飲此水壽多至百歲之上源傍悉生菊草潭澗滋液極

成甘美云此谷之水土食挹長年司空王暢太傅袁隗太尉胡廣並汲飲此水以自綏養是以君子留心甘其臭尚矣菊水東南流入於湍湍水又逕其縣東

南歷冠軍縣西北有楚噶

當從石傍

高下相承八重周十

里方塘蓄水澤潤不窮湍水又逕冠軍縣故城東縣本穰縣之盧陽鄉宛之臨駝聚漢武帝以霍去病功冠諸軍故立冠軍縣以封之水西有漢太尉長史邑人張敏碑碑之西有魏征南軍司馬張詹墓墓有碑碑背刊云白楸之棺易朽之裳銅鐵不入凡器不藏嗟矣後人幸勿我傷自後古墳舊塚莫不夷毀而是墓至元嘉初尚不見發六年大水蠻飢始被發掘說者言初開金銀銅錫之器朱漆雕刻之飾爛然有二

朱漆棺棺前垂竹簾隱以金釘墓不甚高而內極寬

大虛設白楸之言空負黃金之實雖意固

當作銅蓋用張釋之

語南山寧同壽乎湍水又遷穰縣為六門陂漢孝成

之世南陽太守邵信臣以建昭五年斷湍水立穰西

石碣至元始五年更開三門為六石門故號六門碣

也溉穰新野昆陽三縣五千

何氏云五千疑作五萬

餘頃漢末

毀廢遂不修理晉太康三年鎮南將軍杜預復更開

廣利加於民今廢不修矣六門側猶有六門碑是部

曲主安陽亭侯鄧遠等以太康五年立湍水又逕穰縣故城北又東南逕魏武故城之西南是建安三年曹公攻張繡之所築也

又東過白牛邑南

湍水自白牛邑南建武中世祖封劉嵩為侯國湍水又東南逕安衆縣故城南縣本宛之西鄉漢長沙定王子康侯丹之邑也湍水東南流湟水注之水出湟陽縣西北岐嶺山東南逕湟陽縣故城西

在鄧州東六十里

漢武帝元朔四年封路最為侯國王莽之所謂前亭

也應劭曰在湟水之陽矣縣南有二碑碑字紊滅不

可復識云是左伯豪碑

按後漢書左雄傳雄字伯豪南郡涇陽人

涇水又

東南逕安衆縣過而為陂謂之安衆港魏太祖破張

繡於是處與荀彧書曰繡過吾歸師迫我死地蓋於

二水之間以為沿涉之艱阻也涇水又東南流注於

湍水

又東南至新野縣

今仍屬南陽府

東入於涓

湍水至縣西北東分為鄧氏陂漢太傅鄧禹故宅其

奉朝請西亭侯鄧晨故宅陂鄧颺

上下疑有訛字
雍州記云鄧禹

宅與鄧晨宅陂陂相望
雖牆垣已平基塹可識為晨宅略存焉

均水出浙縣北山

明一統志均水在
今襄陽府均州

南流過其縣之東

均水發源弘農郡之盧氏縣熊耳山山南即脩陽舊

陽二縣界也雙峰齊秀望若熊耳因以為名齊桓公

邵陵之會西望熊耳即此山也太史公司馬遷皆嘗

登之縣即浙縣之北鄉故言出浙縣北也

前漢地理
志弘農郡

有浙縣後漢郡國志
析縣改屬南陽郡

均水又東南流注逕其縣下南

越南鄉縣又南流與丹水合

又南當涉都縣邑北南入於沔

均水南逕順陽縣西漢哀帝更為博山縣明帝復曰

順陽應劭曰縣在順水之陽今於是縣則無聞於順

水矣章帝建初四年封衛尉馬康為侯國

按後漢書
馬援傳援

子康以父任為郎顯宗崩受遺詔典掌門禁衛尉肅
宗甚尊重之建初四年封順陽侯此云馬康誤當作

馬康
為是

晉太康中立為順陽縣西有石山南臨洧水洧

水又南流注於沔水謂之洧口者也

禹貢錐指云均口在今穀城縣

界均均同或從水作洧韻會洧字下云隋置洧州取洧水名之是洧即均也史承水經之誤曰洧口晉桓溫伐秦水軍自襄陽入洧口至南鄉是也或又曰洧均口齊陳顯達攻魏馬圈軍入洧均口是也李子田折蹟云水經注順陽縣西有石山南臨洧水洧水又南流注於沔謂之洧口與均水實一水故謂之洧均山故地理志謂之洧水言熊耳之山洧水出焉又東南至順陽入於沔

粉水出房陵縣東流過郢邑南

明一統志粉水源出房山經穀城縣南入漢江

粉水導源東流注上粉縣取此水以潰粉則皓耀鮮

潔有異衆流故縣水皆取名焉

明一統志引雍州記云蕭何夫人於此漬

粉鮮潔異於諸水俗呼為粉漬江此說誕妄不足信

又東過穀邑南東入於沔

粉水至筑陽縣西而下注於沔水謂之粉水粉水

下有

脫字有文將軍冢墓隧前有石虎石柱甚修麗閭邱羨

之為南陽

陽下疑有脫文

葵婦墓側將平其域夕忽

原木夢

文諫止羨之不從後羨之為楊佺期所害論者以為

文將軍之崇也

白水出朝陽縣西東流過其縣南

白河在襄陽府城東北源出南陽鄧州界

下入漢江

王莽更之曰朝陽也為屬信縣

漢志朝陽縣屬南陽郡莽口屬信今云屬

信誤入王莽更之曰朝陽句亦誤疑當作王莽更之曰厲信縣朝陽也為四字似屬衍文

應劭曰

縣在朝水之陽今朝水逕其北而不出其南也蓋邑郭淪移川渠狀改故名舊傳遺稱在令也

又東至新野縣西東入於消

考消水篇清水亦逕新野縣西則白水東入疑是清

水消字訛疑从清為是

泚水出泚陽東北太胡山

按漢志南陽郡比陽下應劭曰比水所出東入蔡後漢書

光武紀漢軍與甄阜梁邱賜戰於泚水西注泚水在今唐州泚陽縣南通典唐州理比陽縣而此作泚陽泚水彼此互異又山海經石者之山泚水出焉西流注於河東始之山泚水出焉東北注於海亦作泚泚與比似可通稱東南流逕其縣南泚水從南來注之

太胡山在泚陽北如東三十餘里廣員五六十里張

衡賦南都所謂天封太胡者也

天封山在今南陽府唐縣境一名太胡山

應劭曰泚水出泚陽縣東入蔡經云泚水從南來注

之然泚陽無泚水蓋悞引之

之字當在壽春下說見後泚水篇

壽春

泚泄耳余以延昌四年蒙除東荊州刺史州治泚陽
縣故城城南有蔡水出南盤石山故亦曰盤石川西
北流注於泚非泄水也呂氏春秋曰齊令章子與韓
魏攻荊荆使唐蔑應之夾泚而軍欲視水之淺深荆
人射之而莫知也有菑一作者曰兵盛則水淺矣章
子夜襲之斬蔑於是水之上也泚水又西澳水注之
水北出茈邱山東流屈而南轉又南入於泚水按山
海經云澳水又北入視不注泚水

山海經云與水出
與山東流注於視

水

余按呂忱字林及難字爾雅並言灤水在泚陽脉

其川流所謂診其水土津注宜是灤水音藥也泚水

又西南歷長岡月城北舊

舊上常有脫文或衍

泚水右會馬仁

陂水水出無陰北山泉流競湊水積成湖蓋地百頃

謂之馬仁陂陂水歷其縣下西南過之以溉田疇公

私引列水流遂斷故瀆尚存泚水又南逕會口與諸

水枝津合泚水又南與澧水會澧水源出於桐柏山

與淮同源而別流西注故亦謂是水為泚水澧水西

北流逕平氏縣故城東北王莽更名其縣曰平善城

內有南陽都鄉正衛

顧氏云衛當從集古錄作街何氏云錄釋作衛

彈勸碑

澧水又西北合澨水水出湖陽北山西流北屈逕平

氏城西為

疑當是而字

北入澧水澧水又西注泚水泚水

自下亦通謂之為泚水昔漢光武破甄阜梁邱賜於

泚水西斬之斯水也泚水又南趙醴二渠出焉泚水

又西南流謝水注之水出謝城北二源微小至城漸

大城周迴側水詩所謂申伯番番既入於謝者也世

祖建武十三年封樊重少子丹為謝陽侯即其國也

然則是水即謝水也

按後漢書樊宏傳宏弟丹封射陽侯此云謝陽恐誤但既引已

詩為證又似無誤豈古本漢書作謝而今本訛作射耶

岸下深浚流

流上疑有脫文

徐

平時人目之為潯潯水城成

一作戍

又以潯潯為目非

也其西城之舊棘陽縣治故亦謂之棘陽城也謝水

又東南逕新都縣左注泚水泚水又西南流逕新都

縣故城西王莽更之曰新林郡國志曰以為新野之

東鄉故新都者也

又西至新野縣

今屬南陽府

南入於清

泚水於岡南西南流戍在岡上泚水又西南與南長

坂門二水合其水東北出湖陽東隆出

疑行當是山字

山之

西側有漢日南太守胡著碑子珎騎都尉尚湖陽長

公主即光武之伯姊也廟堂皆以青石為階陞廟北

有石堂珎之玄孫桂陽太守瑒以延熹四年遭母憂

於墓次立石祠勒銘於梁石宇傾頽而梁宇無毀盛

弘之以為焚重之母畏雷室蓋傳疑之謬也隆山南

有一小山山坂一作坂有兩石虎相對夾隧道雖處蠻

荒全無破毀作制甚工信為妙矣世人因謂之為石

虎山其水西南流逕湖陽縣故城南今在南陽府唐縣南地理

志曰故蓼國也竹書紀年曰楚王會宋平於湖陽者

矣東城中有二碑似是樊重碑悉載故吏人名司馬

彪曰仲山甫封於樊因氏國焉爰自宅陽徙居湖陽

朱云漢志南陽郡有比陽縣湖陽縣此宅陽乃比陽之誤按樊宏傳樊氏仲山甫之後南陽湖陽人也

能治田殖至三百頃起廬舍高樓連閣波陂灌注竹

木成林六畜放牧魚羸稊菓檀棘桑麻閉門成市兵
弩器械資至百萬其興工造作為無窮之巧不可言

言上疑
有脫文

富擬封君世祖之少數歸外氏及之長安受

業齋送甚至世祖即位追爵敬侯詔湖陽為重立廟
置吏奉祠巡祠章陵常幸重墓其水四周城溉城之
東南有若令樊萌中常侍樊安碑城南有數碑無字
又有石廟數間依於墓側棟宇崩毀惟石壁而已亦
不知誰之胄族矣其水南入大湖湖陽之名縣藉茲

而納稱也湖水西南流又與湖陽諸陂散水合謂之板橋水又西南與醴渠合又有趙渠注之二水上承派水南逕新都縣故城東兩瀆雙引南合板橋水板橋水又西南與長水會水上承唐子襄鄉諸陂散流也唐子陂在唐子山西南有唐子亭漢光武自新野屠唐子鄉殺湖陽尉於是地陂水清深光武後以為神淵西南流入新野縣與板橋水合西南注於泚水又西南流注於涓水也

水經注集釋訂訛卷二十九